

| अथ चतुर्थं मण्डलम् |

(20)

1

(म.4, अनु.1)

ऋषिः वामदेवः गौतमः छन्दः अष्टिः 1, अतिजगती 2, धृतिः 3, त्रिष्टुप् 4-20 देवता अग्निः 1,6-20,
अग्निः वरुणः च वा 2-5

त्वां ह्यग्ने सदमित्समन्यवो देवासो देवमरुतिं न्यैरिर इति क्रत्वा न्यैरिरे |
अमर्त्यं यजत् मर्त्येष्व्वा देवमादेवं जनत् प्रचेतसं विश्वमादेवं जनत् प्रचेतसम् || 1 ||
स भ्रातरं वरुणमग्र आ ववृत्स्व देवां अच्छा सुमती यज्ञवर्नसं ज्येष्ठं यज्ञवर्नसम् |
ऋतावानमादित्यं चर्षणीधृतं राजानं चर्षणीधृतम् || 2 ||
सखे सखायमभ्या ववृत्स्वाशुं न चक्रं रथ्येव रंह्यास्मभ्यं दस्म रंह्या |
अग्रं मृळीकं वरुणे सचा विदो मरुत्सु विश्वभानुषु |
तोकायं तुजे शुशुचान् शं कृध्यस्मभ्यं दस्म शं कृधि || 3 ||
त्वं नो अग्ने वरुणस्य विद्वान्देवस्य हेळोऽव यासिसीष्ठाः |
यजिष्ठो वह्नितमः शोशुचानो विश्वा द्वेषांसि प्र मुमुग्ध्यस्मत् || 4 ||
स त्वं नो अग्नेऽवमो भवोती नेदिष्ठो अस्या उषसो व्युष्टौ |
अव यक्ष्व नो वरुणं रराणो वीहि मृळीकं सुहवो न एधि || 5 ||
अस्य श्रेष्ठा सुभगस्य संदग्देवस्य चित्रतमा मर्त्येषु |
शुचिं घृतं न तप्तमध्यायाः स्पार्हा देवस्य मंहनेव धेनोः || 6 ||
त्रिरस्य ता परमा सन्ति सत्या स्पार्हा देवस्य जनिमान्यग्नेः |
अनुन्ते अन्तः परिवीत् आगाच्छुचिः शुक्रो अर्यो रोरुचानः || 7 ||
स दूतो विश्वेदुभि वष्टि सद्वा होता हिरण्यरथो रंसुजिह्वः |
रोहिदश्वो वपुष्यो विभावा सदा रण्वः पितुमतीव संसत् || 8 ||
स चेतयन्मनुषो यज्ञबन्धुः प्र तं म्हा रशनया नयन्ति |
स क्षैत्यस्य दुर्यासु साधन्देवो मर्तस्य सधनित्वमाप || 9 ||
स तू नो अग्निर्नयतु प्रजानन्नच्छा रत्नं देवभक्तं यदस्य |
धिया यद्विश्वे अमृता अकृण्वन्द्यौषिता जनिता सत्यमुक्षन् || 10 ||
स जायत प्रथमः पस्त्यासु महो बुधे रजसो अस्य योनौ |
अपादशीर्षा गुहमानो अन्तायोर्युवानो वृषभस्य नीळे || 11 ||
प्र शर्धं आर्तं प्रथमं विपन्यां ऋतस्य योना वृषभस्य नीळे |
स्पार्हो युवा वपुष्यो विभावा सप्त प्रियासोऽजनयन्त वृष्णे || 12 ||
अस्माकमत्र पितरो मनुष्या अभि प्र सैदुर्ऋतमाशुषाणाः |
अश्मत्रजाः सुदुघा वृत्रे अन्तरुदुस्त्रा आजन्नुषसो हुवानाः || 13 ||

ते मर्मजत ददृवांसो अद्रिं तदैषामन्ये अभितो वि वौचन्	
पृथ्वर्यन्त्रासो अभि कारमर्चन्विदन्त ज्योतिश्चकृपन्त धीभिः	॥ 14 ॥
ते गंव्यता मनसा दृध्रमुब्धं गा येमानं परि षन्तमद्रिम्	
दृळ्हं नरो वचसा दैव्येन व्रजं गोमन्तमुशिजो वि वव्रुः	॥ 15 ॥
ते मन्वत प्रथमं नाम धेनोस्त्रिः सप्त मातुः परमाणि विन्दन्	
तज्जानतीरभ्यनूषत् त्रा आविर्भुवदरुणीर्यशसा गोः	॥ 16 ॥
नेशत्तमो दुधितं रोचत् द्यौरुद्वेव्या उषसो भानुरर्त	
आ सूर्यो बृहतस्तिष्ठदज्रां ऋजु मर्तेषु वृजिना च पश्यन्	॥ 17 ॥
आदित्पश्चा बुबुधाना व्यख्यन्नादिद्रव्यं धारयन्त द्युभक्तम्	
विश्वे विश्वासु दुर्यासु देवा मित्रं धिये वरुण सत्यमस्तु	॥ 18 ॥
अच्छा वोचेय शशुचानमग्निं होतारं विश्वभरसं यजिष्ठम्	
शुच्यूधो अतृणन्न गवामन्धो न पूतं परिषिक्तमंशोः	॥ 19 ॥
विश्वेषामदितिर्यज्ञियानां विश्वेषामतिथिर्मानुषाणाम्	
अग्निदेवानामव आवृणानः सुमृळीको भवतु जातवेदाः	॥ 20 ॥

(20)

2

(म.4, अनु.1)

ऋषिः वामदेवः गौतमः

छन्दः त्रिष्टुप्

देवता अग्निः

यो मर्त्येष्वमृतं ऋतावा देवो देवेष्वरतिर्निधायि	
होता यजिष्ठो म्हा शुच्यै हव्यैरग्निर्मनुष ईर्यध्वै	॥ 1 ॥
इह त्वं सूनो सहसो नो अद्य जातो जातां उभयां अन्तरंग्रे	
दूत ईयसे युयुजान ऋष्व ऋजुमुष्कान्वृषणः शुक्रांश्च	॥ 2 ॥
अत्या वृधस्त्रू रोहिता घृतस्त्रू ऋतस्य मन्ये मनसा जविष्ठा	
अन्तरीयसे अरुषा युजानो युष्मांश्च देवान्विश आ च मर्तान्	॥ 3 ॥
अर्यमणं वरुणं मित्रमेषामिन्द्राविष्णू मरुतो अश्विनोत	
स्वश्वो अग्रे सुरथः सुराधा एदु वह सुहविषे जनाय	॥ 4 ॥
गोमां अग्नेऽविमां अश्वी यज्ञो नृवत्सखा सदमिदप्रमृष्यः	
इळावाँ एषो असुर प्रजावान्दीर्घो रयिः पृथुबुध्नः सभावान्	॥ 5 ॥
यस्त इध्मं जभरत्सिष्विदानो मूर्धानं वा ततपते त्वाया	
भुवस्तस्य स्वतवाँ पायुरंग्रे विश्वस्मात्सीमघायत उरुष्य	॥ 6 ॥
यस्ते भरादन्नियते चिदन्नं निशिषन्मन्द्रमतिथिमुदीरत्	
आ दैव्युरिनधते दुरोणे तस्मिन्नयिर्ध्रुवो अस्तु दास्वान्	॥ 7 ॥
यस्त्वा दोषा य उषसि प्रशंसात्प्रियं वा त्वा कृणवते हविष्मान्	

अश्वो न स्वे दम् आ हेम्यावान्तमंहसः पीपरो द्वाश्वांसम्	॥ 8 ॥
यस्तुभ्यमग्रे अमृताय दाशद्दुवस्त्वे कृणवते यत्स्रुक्	
न स राया शशमानो वि योषन्नैनमंहः परि वरदघायोः	॥ 9 ॥
यस्य त्वमग्रे अध्वरं जुजौषो देवो मर्तस्य सुधितं रराणः	
प्रीतेदसद्भोत्रा सा यविष्ठासाम् यस्य विधृतो वृधासः	॥ 10 ॥
चित्तिमचित्तिं चिनवद्वि विद्वान्पृष्ठेव वीता वृजिना च मर्तान्	
राये च नः स्वपत्याय देव दितिं च रास्वादितिमुरुष्य	॥ 11 ॥
कृविं शशासुः क्वयोऽदब्धा निधारयन्तो दुर्यास्वायोः	
अतस्त्वं दृश्याँ अग्र एतान्पङ्क्तिः पश्येरद्धताँ अर्य एवैः	॥ 12 ॥
त्वमग्रे वाघते सुप्रणीतिः सुतसोमाय विधृते यविष्ठ	
रत्नं भर शशमानाय घृष्णे पृथु श्चन्द्रमवसे चर्षणिप्राः	॥ 13 ॥
अधा ह यद्वयमग्रे त्वाया पङ्क्तिर्हस्तेभिश्चकृमा तनूभिः	
रथं न क्रन्तो अपसा भुरिजोऽर्कृतं येमुः सुध्य आशुषाणाः	॥ 14 ॥
अधा मातुरुषसः सप्त विप्रा जायेमहि प्रथमा वेधसो नृन्	
दिवस्पुत्रा अङ्गिरसो भवेमाद्रिं रुजेम धनिनं शुचन्तः	॥ 15 ॥
अधा यथा नः पितरः परासः प्रत्वासो अग्र ऋतमाशुषाणाः	
शुचीदयन्दीधितिमुक्थशासुः क्षामा भिन्दन्तो अरुणीरपं व्रन्	॥ 16 ॥
सुकर्माणः सुरुचो देवयन्तोऽयो न देवा जनिमा धमन्तः	
शुचन्तो अग्निं ववृधन्त इन्द्रमूर्ध्वं गव्यं परिषदन्तो अगमन्	॥ 17 ॥
आ यूथेव क्षुमतिं पश्वो अख्यद्वेवानां यज्जनिमान्त्युग्र	
मर्तानां चिदुर्वशीरकृप्रन्वृधे चिदर्य उपरस्यायोः	॥ 18 ॥
अकर्म ते स्वपसो अभूम ऋतमवसन्नृषसो विभातीः	
अनूनमग्निं पुरुधा सुश्चन्द्रं देवस्य मर्मृजत्श्चारु चक्षुः	॥ 19 ॥
एता ते अग्र उचथानि वेधोऽवोचाम क्वये ता जुषस्व	
उच्छोचस्व कृणुहि वस्यसो नो महो रायः पुरुवार प्र यन्धि	॥ 20 ॥

(16)

3

(म.4, अनु.1)

ऋषिः वामदेवः गौतमः

छन्दः त्रिष्टुप्

देवता अग्निः (रुद्रः) 1, अग्निः 2-16

आ वो राजानमध्वरस्य रुद्रं होतारं सत्ययजं रोदस्योः	
---------------------------------------------------	--

अग्निं पुरा तेनयित्वा रचित्ताद्धिरण्यरूपमवसे कृणुध्वम्	॥ 1 ॥
--------------------------------------------------------	-------

अयं योनिश्चकृमा यं वयं ते जायेव पत्यं उशती सुवासाः	
----------------------------------------------------	--

अर्वाचीनः परिवीतो नि षीदेमा उ ते स्वपाक प्रतीचीः	॥ 2 ॥
--------------------------------------------------	-------

आशृण्वते अर्हपिताय मन्म नृचक्षसे सुमृळीकाय वेधः	
देवाय श्स्तिमृताय शंसु ग्रावेवु सोता मधुषुद्यमीळे	॥ 3 ॥
त्वं चिन्नः शम्या अग्रे अस्या ऋतस्य बोध्यतचित्स्वाधीः	
कदा तं उक्था संधमाद्यानि कदा भवन्ति सुख्या गृहे ते	॥ 4 ॥
कथा ह तद्वरुणाय त्वमग्रे कथा दिवे गर्हसे कन्न आगः	
कथा मित्राय मीळहृषे पृथिव्यै ब्रवः कदर्यम्णे कद्ग्राय	॥ 5 ॥
कद्विष्यासु वृधसानो अग्रे कद्वाताय प्रतवसे शुभ्ये	
परिज्मने नासत्याय क्षे ब्रवः कदग्रे रुद्राय नृग्ने	॥ 6 ॥
कथा महे पुष्टिभराय पूष्णे कद्द्राय सुमखाय हविर्दे	
कद्विष्याव उरुगायाय रेतो ब्रवः कदग्रे शरवे बृहत्यै	॥ 7 ॥
कथा शर्धाय मरुतामृताय कथा सुरे बृहते पृच्छ्यमानः	
प्रति ब्रवोऽदितये तुराय साधा दिवो जातवेदश्चिकित्वान्	॥ 8 ॥
ऋतेन ऋतं नियतमीळ आ गोरामा सचा मधुमत्पुक्रमग्रे	
कृष्णा सुती रुशता धासिनैषा जामर्येण पर्यसा पीपाय	॥ 9 ॥
ऋतेन हि ष्मा वृषभश्चिदुक्तः पुमाँ अग्निः पर्यसा पृष्ठ्येन	
अस्पन्दमानो अचरद्वयोधा वृषा शुक्रं दुदुहे पृश्चिरूधः	॥ 10 ॥
ऋतेनाद्रिं व्यसन्भिदन्तः समङ्गिरसो नवन्त गोभिः	
शुनं नरः परि षदनुषासमाविः स्वरभवज्जाते अग्रौ	॥ 11 ॥
ऋतेन देवीरमृता अमृक्ता अणोभिरापो मधुमद्विरग्रे	
वाजी न सर्गेषु प्रस्तुभानः प्र सदमित्स्त्रवितवे दधन्युः	॥ 12 ॥
मा कस्य युक्षं सदमिद्धुरो गा मा वेशस्य प्रमिनतो मापेः	
मा भ्रातुरग्रे अनृजोऋणं वेर्मा सख्युर्दक्षं रिपोर्भुजेम	॥ 13 ॥
रक्षा णो अग्रे तव रक्षणेभी रारक्षाणः सुमख प्रीणानः	
प्रति ष्फुर वि रुज वीङ्गहो जहि रक्षो महि चिद्वावृधानम्	॥ 14 ॥
एभिर्भव सुमना अग्रे अर्केरिमान्त्स्पृश मन्मभिः शूर वाजान्	
उत ब्रह्माण्यङ्गिरो जुषस्व सं ते श्स्तिर्देववाता जरेत	॥ 15 ॥
एता विश्वा विदुषे तुभ्यं वेधो नीथान्यग्रे निण्या वचांसि	
निवचना क्वये काव्यान्यशांसिषं मतिभिर्विप्र उक्थैः	॥ 16 ॥

कृणुष्व पाजुः प्रसितिं न पृथ्वीं याहि राजेवामवाँ इभेन	
तृष्वीमनु प्रसितिं द्रुणानोऽस्तासि विध्य रक्षसस्तपिष्ठैः	॥ 1 ॥
तव भ्रमास आशुया पतन्त्यनु स्पृश धृषता शोशुचानः	
तपूंष्यग्रे जुह्वा पतङ्गानसंदितो वि सृज विष्वगुल्काः	॥ 2 ॥
प्रति स्पशो वि सृज तूर्णितमो भवा पायुर्विशो अस्या अदब्धः	
यो नो दूरे अघशंसो यो अन्त्यग्रे मार्किष्टे व्यथिरा दधर्षीत्	॥ 3 ॥
उदग्रे तिष्ठ प्रत्या तनुष्व न्यश्मित्राँ ओषतात्तिग्महेते	
यो नो अरातिं समिधान चक्रे नीचा तं धक्ष्यत्सं न शुष्कम्	॥ 4 ॥
ऊर्ध्वो भव प्रति विध्याध्यस्मदाविष्कृणुष्व दैव्यान्यग्रे	
अव स्थिरा तनुहि यातुजूनां जामिमजामिं प्र मृणीहि शत्रून्	॥ 5 ॥
स ते जानाति सुमतिं यविष्ठ य ईवते ब्रह्मणे गातुमैरत्	
विश्वान्यस्मै सुदिनानि रायो द्युम्रान्यर्यो वि दुरो अभि द्यौत्	॥ 6 ॥
सेदग्रे अस्तु सुभर्गः सुदानुर्यस्त्वा नित्येन हविषा य उक्थैः	
पिप्रीषति स्व आयुषि दुरोणे विश्वेदस्मै सुदिना सासदिष्टिः	॥ 7 ॥
अर्चामि ते सुमतिं घोष्यर्वाक्सं ते वावाता जरतामियं गीः	
स्वश्वास्त्वा सुरथा मर्जयेमास्मे क्षत्राणि धारयेरनु द्यून्	॥ 8 ॥
इह त्वा भूर्या चरेदुप त्मन्दोषावस्तर्दीदिवांसमनु द्यून्	
क्रीळन्तस्त्वा सुमनसः सपेमाभि द्युम्रा तस्थिवांसो जनानाम्	॥ 9 ॥
यस्त्वा स्वश्वः सुहिरण्यो अग्र उपयाति वसुमता रथेन	
तस्य त्राता भवसि तस्य सखा यस्त आतिथ्यमानुषगजुजोषत्	॥ 10 ॥
महो रुजामि बन्धुता वचोभिस्तन्मा पितुर्गोतमादन्वियाय	
त्वं नो अस्य वचसश्चिकिद्धि होतर्यविष्ठ सुक्रतो दमूनाः	॥ 11 ॥
अस्वप्नजस्तरणयः सुशेवा अतन्द्रासोऽवृका अश्रमिष्ठाः	
ते पायवः सध्व्यञ्चो निषद्याग्रे तव नः पान्त्वमूर	॥ 12 ॥
ये पायवो मामतेयं ते अग्रे पश्यन्तो अन्धं दुरितादरक्षन्	
ररक्ष तान्तसुकृतो विश्ववेदा दिप्सन्त इद्विपवो नाह देभुः	॥ 13 ॥
त्वया वयं सध्वन्यश्स्त्वोतास्तव प्रणीत्यश्याम् वाजान्	
उभा शंसा सूदय सत्यतातेऽनुष्ठुया कृणुह्यहयाण	॥ 14 ॥

अ॒या ते॑ अ॒ग्ने स॒मिधा॑ वि॒धेम॒ प्रति॑ स्तोमं॑ श॒स्य॒मानं॑ गृ॒भाय॑ ।
द॒हाश॑सो॒ र॒क्षसः॑ पा॒ह्यश॑स्मान्द्रु॒हो नि॒दो मि॑त्रम॒हो अ॒व॒द्यात् ॥ 15 ॥

। इति तृतीयाष्टके चतुर्थोऽध्यायः समाप्तः ।

(पञ्चमोऽध्यायः ॥ वर्गाः 1-26)

(1)

5

(म.4, अनु.1)

ऋषिः वामदेवः गौतमः

छन्दः त्रिष्टुप्

देवता वैश्वानरः अग्निः

वैश्वानराय मीळहृषे सृजोषाः कृथा दाशेमाग्रये बृहद्भाः	
अनूनेन बृहता वक्षथेनोप स्तभायदुपमिन्न रोधः	॥ 1 ॥
मा निन्दत् य इमां मह्यं रातिं देवो ददौ मर्त्याय स्वधावान्	
पाकाय गृत्सो अमृतो विचेता वैश्वानरो नृतमो यद्बो अग्निः	॥ 2 ॥
सामं द्विर्बा मर्हि तिग्मभृष्टिः सहस्ररेता वृषभस्तुविष्मान्	
पदं न गोरपगूळहं विविद्वानग्निर्मह्यं प्रेदुं वोचन्मनीषाम्	॥ 3 ॥
प्र तां अग्निर्भसत्तिग्मजम्भस्तपिष्ठेन शोचिषा यः सुराधाः	
प्र ये मिनन्ति वरुणस्य धामं प्रिया मित्रस्य चेततो ध्रुवाणि	॥ 4 ॥
अभ्रातरो न योषणो व्यन्तः पतिरिपो न जनयो दुरेवाः	
पापासः सन्तो अनृता असत्या इदं पदमजनता गभीरम्	॥ 5 ॥
इदं मे अग्रे कियते पावकामिनते गुरुं भारं न मन्म	
बृहद्धाथ धृषता गभीरं यद्बं पृष्ठं प्रयसा सप्तधातु	॥ 6 ॥
तमिन्वेव समना समानमभि क्रत्वा पुनृती धीतिरश्याः	
ससस्य चर्मन्धि चारु पृश्नेरग्रे रूप आरुपितं जबारु	॥ 7 ॥
प्रवाच्यं वचसः किं मे अस्य गुहा हितमुप निणिग्वदन्ति	
यदुस्त्रियाणामप वारिव व्रन्याति प्रियं रूपो अग्रं पदं वेः	॥ 8 ॥
इदमु त्यन्मर्हि महामनीकं यदुस्त्रिया सचत पूर्व्य गौः	
ऋतस्य पदे अधि दीद्यानं गुहा रघुष्यद्रघुयद्विवेद	॥ 9 ॥
अधं द्युतानः पित्रोः सचासामनुत् गुह्यं चारु पृश्नेः	
मातुष्पदे परमे अन्ति षद्रोवृष्णाः शोचिषः प्रयतस्य जिह्वा	॥ 10 ॥
ऋतं वोचे नमसा पृच्छ्यमानस्तवाशसा जातवेदो यदीदम्	
त्वमस्य क्षयसि यद्ध विश्वं दिवि यदु द्रविणं यत्पृथिव्याम्	॥ 11 ॥
किं नो अस्य द्रविणं कद्ध रत्नं वि नो वोचो जातवेदश्चिकित्वान्	
गुहाध्वनः परमं यन्नो अस्य रेकु पदं न निदाना अगन्म	॥ 12 ॥
का मर्यादा वयुना कद्ध वाममच्छा गमेम रघवो न वाजम्	
कदा नो देवीरमृतस्य पत्नीः सूरुो वर्णेन ततननुषासः	॥ 13 ॥
अनिरेण वचसा फलवेन प्रतीत्येन कृधुनातृपासः	
अधा ते अग्रे किमिहा वदन्त्यनायुधास आसता सचन्ताम्	॥ 14 ॥
अस्य श्रिये समिधानस्य वृष्णो वसोरनीकं दम् आ रुरोच	
रुशद्वसानः सुदृशीकरूपः क्षितिर्न राया पुरुवारो अद्यौत्	॥ 15 ॥

ऋषिः वामदेवः गौतमः

छन्दः त्रिष्टुप्

देवता अग्निः

ऊर्ध्वं ऊ षु णो अध्वरस्य होत्रग्रे तिष्ठ देवताता यजीयान्	
त्वं हि विश्वमभ्यसि मन्म प्र वेधसश्चित्तरसि मनीषाम्	॥ 1 ॥
अमूरो होता न्यसादि विक्ष्वशंग्रिर्मन्द्रो विदथेषु प्रचेताः	
ऊर्ध्वं भानुं सवितेवाश्रेन्मेतेव धूमं स्तंभायदुप द्याम्	॥ 2 ॥
यता सुजुर्णी रातिनीं घृताचीं प्रदक्षिणिद्वेवतातिमुराणः	
उदु स्वरुर्नवजा नाक्रः पश्वो अनक्ति सुधितः सुमेकः	॥ 3 ॥
स्तीर्णो बर्हिषि समिधाने अग्रा ऊर्ध्वो अध्वर्युर्जुषाणो अस्थात्	
पर्यग्निः पशुपा न होता त्रिविष्ट्येति प्रदिव उराणः	॥ 4 ॥
परि त्मनां मितद्वरेति होताग्निर्मन्द्रो मधुवचा ऋतावा	
द्रवन्त्यस्य वाजिनो न शोका भयन्ते विश्वा भुवना यदध्राट्	॥ 5 ॥
भद्रा ते अग्रे स्वनीक संदग्घोरस्य सतो विषुणस्य चारुः	
न यत्ते शोचिस्तमसा वरन्त न ध्वस्मानस्तन्वीरे रेप आ धुः	॥ 6 ॥
न यस्य सातुर्जनितोरवारि न मातरापितरा नू चिदिष्टौ	
अथा मित्रो न सुधितः पावकोऽग्निर्दीदाय मानुषीषु विक्षु	॥ 7 ॥
द्विर्यं पञ्च जीर्जनन्त्संवसानाः स्वसारो अग्निं मानुषीषु विक्षु	
उषर्बुधमथयोरे न दन्तं शुक्रं स्वासं परशुं न तिग्मम्	॥ 8 ॥
तव त्वे अग्रे हरितो घृतस्ना रोहितास ऋज्वञ्चः स्वञ्चः	
अरुषासो वृषण ऋजुमुष्का आ देवतातिमहन्त दुस्माः	॥ 9 ॥
ये ह त्वे ते सहमाना अयासस्त्वेषासो अग्रे अर्चयश्चरन्ति	
श्येनासो न दुवसनासो अर्थं तुविष्णसो मारुतं न शर्धः	॥ 10 ॥
अकारि ब्रह्म समिधान् तुभ्यं शंसात्युक्थं यजते व्यू धाः	
होतारमग्निं मनुषो नि षेदुर्नमस्यन्त उशिजः शंसमायोः	॥ 11 ॥

ऋषिः वामदेवः गौतमः

छन्दः जगती 1, अनुष्टुप् 2-6, त्रिष्टुप् 7-11

देवता अग्निः

अयमिह प्रथमो धायि धातृभिर्होता यजिष्ठो अध्वरेष्वीड्यः	
यमप्रवानो भृगवो विरुचुर्वनेषु चित्रं विभ्वं विशेविशे	॥ 1 ॥
अग्रे कदा त आनुषग्भुवद्वेवस्य चेतनम्	
अथा हि त्वां जगृध्रिरे मर्तासो विक्ष्वीड्यम्	॥ 2 ॥
ऋतावानं विचेतसं पश्यन्तो द्यामिव स्तृभिः	
विश्वेषामध्वराणां हस्कृत्तारं दमेदमे	॥ 3 ॥

आशुं दूतं विवस्वतो विश्वा यश्चर्षणीरभि	
आ जभ्रुः केतुमायवो भृगवाणं विशेविशे	॥ 4 ॥
तमीं होतारमानुषक्चिकित्वांसं नि षेदिरे	
रण्वं पावकशौचिषं यजिष्ठं सप्त धार्मभिः	॥ 5 ॥
तं शश्वतीषु मातृषु वन आ वीतमश्रितम्	
चित्रं सन्तं गुहां हितं सुवेदं कूचिदर्थिनम्	॥ 6 ॥
ससस्यु यद्वियुता सस्मिन्नूधन्नृतस्य धामन्नणयन्त देवाः	
महाँ अग्निर्ममसा रातहव्यो वेरंध्वराय सदमिदृतावा	॥ 7 ॥
वेरंध्वरस्य दूत्यानि विद्वानुभे अन्ता रोदसी संचिकित्वान्	
दूत ईयसे प्रदिव उराणो विदुष्टरो दिव आरोधनानि	॥ 8 ॥
कृष्णं त एम् रुशतः पुरो भाश्चरिष्ववर्चिर्वपुषामिदेकम्	
यदप्रवीता दधते ह गभं सद्यश्चिज्जातो भवसीदु दूतः	॥ 9 ॥
सद्यो जातस्य ददृशान्मोजो यदस्य वातो अनुवार्ति शोचिः	
वृणक्ति तिग्मामतसेषु जिह्वां स्थिरा चिदन्ना दयते वि जम्भैः	॥ 10 ॥
तृषु यदन्ना तृषुणा ववक्ष तृषु दूतं कृणुते यद्वा अग्निः	
वार्तस्य मेळिं संचते निजूर्वन्नाशुं न वाजयते हिन्वे अर्वा	॥ 11 ॥

(8)

8

(म.4, अनु.1)

ऋषिः वामदेवः गौतमः	छन्दः गायत्री	देवता अग्निः
--------------------	---------------	--------------

दूतं वो विश्ववेदसं हव्यवाहममर्त्यम्	यजिष्ठमृञ्जसे गिरा	॥ 1 ॥
स हि वेदा वसुधितिं महाँ आरोधनं दिवः	स देवाँ एह वक्षति	॥ 2 ॥
स वेद देव आनमं देवाँ ऋतायते दमे	दाति प्रियाणि चिद्वसु	॥ 3 ॥
स होता सेदु दूत्यं चिकित्वाँ अन्तरीयते	विद्वान् आरोधनं दिवः	॥ 4 ॥
ते स्याम ये अग्र्ये ददाशुर्हव्यदातिभिः	य ई पुष्यन्त इन्धते	॥ 5 ॥
ते राया ते सुवीर्यैः ससवांसो वि शृण्विरे	ये अग्ना दधिरे दुर्वः	॥ 6 ॥
अस्मे रायो दिवेदिवे सं चरन्तु पुरुस्पृहः	अस्मे वाजास ईरताम्	॥ 7 ॥
स विप्रश्चर्षणीनां शवसा मानुषाणाम्	अति क्षिप्रेव विध्यति	॥ 8 ॥

(8)

9

(म.4, अनु.1)

ऋषिः वामदेवः गौतमः	छन्दः गायत्री	देवता अग्निः
--------------------	---------------	--------------

अग्ने मृळ महाँ असि य ईमा देव्युं जनम्	इयेथ बहिरासदम्	॥ 1 ॥
स मानुषीषु दूळभो विक्षु प्रावीरमर्त्यः	दूतो विश्वेषां भुवत्	॥ 2 ॥
स सद्म परि णीयते होता मन्द्रो दिविष्टिषु	उत पोता नि षीदति	॥ 3 ॥
उत ग्रा अग्रिंध्वर उतो गृहपतिर्दमे	उत ब्रह्मा नि षीदति	॥ 4 ॥

वेषि ह्यध्वरीयतामुपवृक्ता जनानाम्	हव्या च मानुषाणाम्	॥ 5 ॥
वेषीद्वस्य दूत्यं यस्य जुजोषो अध्वरम्	हव्यं मर्तस्य वोळहवे	॥ 6 ॥
अस्माकं जोष्यध्वरमुस्माकं यज्ञमङ्गिरः	अस्माकं शृणुधी हवम्	॥ 7 ॥
परि ते दूळभो रथोऽस्माँ अश्रोतु विश्वतः	येन रक्षसि दाशुषः	॥ 8 ॥

(8)

10

(म.4, अनु.1)

ऋषिः वामदेवः गौतमः	छन्दः पदपङ्क्तिः 1-3, पदपङ्क्तिः उष्णिक् वा 4,6-7, महापदपङ्क्तिः 5, उष्णिक् 8
देवता अग्निः	

अग्ने तमद्याश्वं न स्तोमैः क्रतुं न भद्रं हृदिस्पृशाम्	ऋध्यामा त् ओहैः	॥ 1 ॥
अधा ह्यग्ने क्रतोर्भद्रस्य दक्षस्य साधोः	रथीर्ऋतस्य बृहतो बभूथ	॥ 2 ॥
एभिर्नो अर्केर्भवा नो अर्वाङ् स्वर्णं ज्योतिः	अग्ने विश्वेभिः सुमना अनीकैः	॥ 3 ॥
आभिष्टे अद्य गीर्भिर्गृणन्तोऽग्ने दाशेम	प्र ते दिवो न स्तनयन्ति शुष्माः	॥ 4 ॥
तव स्वादिष्टाग्ने संदृष्टिरिदा चिदहं इदा चिदुक्तोः	श्रिये रुक्मो न रोचत उपाके	॥ 5 ॥
घृतं न पूतं तनूररेपाः शुचि हिरण्यम्	तत्ते रुक्मो न रोचत स्वधावः	॥ 6 ॥
कृतं चिद्धि ष्मा सनेमि द्वेषोऽग्रं इनोषि मर्तात्	इत्था यजमानादृतावः	॥ 7 ॥
शिवा नः सख्या सन्तु भ्रात्राग्ने देवेषु युष्मे	सा नो नाभिः सदेने सस्मिन्नूधन्	॥ 8 ॥

(6)

11

(म.4, अनु.2)

ऋषिः वामदेवः गौतमः	छन्दः त्रिष्टुप्	देवता अग्निः
--------------------	------------------	--------------

भद्रं ते अग्ने सहसिन्ननीकमुपाक आ रोचते सूर्यस्य	
रुशद्दृशे ददृशे नक्त्या चिदरूक्षितं दृश आ रूपे अन्नम्	॥ 1 ॥
वि षाह्यग्ने गृणते मनीषां खं वेपसा तुविजात् स्तवानः	
विश्वेभिर्यद्वावनः शुक्र देवैस्तन्नो रास्व सुमहो भूरि मन्म	॥ 2 ॥
त्वदग्ने काव्या त्वन्मनीषास्त्वदुक्था जायन्ते राध्यानि	
त्वदेति द्रविणं वीरपेशा इत्थाधिये दाशुषे मर्त्याय	॥ 3 ॥
त्वद्वाजी वाजंभरो विहाया अभिष्टिकृज्जायते सत्यशुष्मः	
त्वद्दयिर्देवजूतो मयोभुस्त्वदाशुर्जूजुवाँ अग्ने अर्वा	॥ 4 ॥
त्वामग्ने प्रथमं देव्यन्तो देवं मर्ता अमृत मन्द्रजिह्वम्	
द्वेषोयुत्तमा विवासन्ति धीभिर्दमूनसं गृहपतिममूरम्	॥ 5 ॥
आरे अस्मदमतिमारे अहं आरे विश्वाँ दुर्मतिं यन्निपासि	
दोषा शिवः सहसः सूनो अग्ने यं देव आ चित्सर्चसे स्वस्ति	॥ 6 ॥

(6)

12

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता अग्निः

यस्त्वामग्र इन्धते यत्सुक्त्रिस्ते अन्नं कृणवत्सस्मिन्नहन्	
स सु द्युप्रैरभ्यस्तु प्रसक्षत्तव क्रत्वा जातवेदश्चिकित्वान्	॥ 1 ॥
इध्मं यस्ते जभरच्छश्रमाणो महो अग्ने अनीकमा संपर्यन्	
स इधानः प्रति दोषामुषासं पुष्यन्नयि संचते घ्नन्मित्रान्	॥ 2 ॥
अग्निरीशे बृहतः क्षत्रियस्याग्निर्वाजस्य परमस्य रायः	
दधाति रत्नं विधत्ते यविष्ठो व्यानुषड्मर्त्याय स्वधावान्	॥ 3 ॥
यच्चिद्धि ते पुरुषत्रा यविष्ठाचित्तिभिश्चकृमा कच्चिदागः	
कृधी ष्वश्र्मां अदितेरनागान्व्येनांसि शिश्रथो विष्वगग्ने	॥ 4 ॥
महश्चिदग्र एनसो अभीक ऊर्वाद्देवानामुत मर्त्यानाम्	
मा ते सखायुः सदमिद्रिषाम् यच्छा तोकाय तनयाय शं योः	॥ 5 ॥
यथा ह त्यद्वसवो गौर्यं चित्पदि षिताममुञ्चता यजत्राः	
एवो ष्वश्र्मन्मुञ्चता व्यंहः प्र तार्यग्ने प्रतरं न आयुः	॥ 6 ॥

(5)

13

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता अग्निः (लिङ्गोक्तदेवताः इति एके)

प्रत्यग्निरुषसामग्रमख्यद्विभातीनां सुमना रत्नधेयम्	
यातमश्विना सुकृतो दुरोणमुत्सूर्यो ज्योतिषा देव एति	॥ 1 ॥
ऊर्ध्वं भानुं सविता देवो अश्रेद्द्रप्सं दविध्वद्गविषो न सत्वा	
अनु व्रतं वरुणो यन्ति मित्रो यत्सूर्यं दिव्यारोहयन्ति	॥ 2 ॥
यं सीमकृण्वन्तमसे विपृचे ध्रुवक्षेमा अनवस्यन्तो अर्थम्	
तं सूर्यं हरितः सप्त युद्धीः स्पशं विश्वस्य जगतो वहन्ति	॥ 3 ॥
वहिष्ठेभिर्विहरन्त्यासि तन्तुमव्ययन्नसितं देव वस्म	
दविध्वतो रश्मयः सूर्यस्य चर्मेवावाधुस्तमो अप्स्वश्रन्तः	॥ 4 ॥
अनायतो अनिबद्धः कथायं न्यङ्कुत्तानोऽव पद्यते न	
कया याति स्वधया को ददर्श दिवः स्कम्भः समृतः पाति नाकम्	॥ 5 ॥

(5)

14

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता अग्निः मान्त्रवर्णिकं वा

प्रत्यग्निरुषसो जातवेदा अख्यद्देवो रोचमाना महोभिः	
आ नासत्योरुगाया रथेनेमं यज्ञमुप नो यातमच्छ	॥ 1 ॥
ऊर्ध्वं केतुं सविता देवो अश्रेज्योतिर्विश्वस्मै भुवनाय कृण्वन्	
आप्रा द्यावापृथिवी अन्तरिक्षं वि सूर्यो रश्मिभिश्चेकितानः	॥ 2 ॥

आवहन्त्यरुणीज्योतिषागान्मही चित्रा रश्मिभिश्चेकिताना ।
 प्रबोधयन्ती सुविताय देव्युंषा ईयते सुयुजा रथेन ॥ 3 ॥
 आ वां वहिष्ठा इह ते वहन्तु रथा अश्वास उषसो व्युष्टौ ।
 इमे हि वां मधुपेयाय सोमा अस्मिन्यज्ञे वृषणा मादयेथाम् ॥ 4 ॥
 अनायतो अनिबद्धः कथायं न्यङ्कुत्तानोऽव पद्यते न ।
 कया याति स्वधया को ददर्श दिवः स्कम्भः समृतः पाति नाकम् ॥ 5 ॥

(10)

15

(म.4, अनु.2)

ऋषिः वामदेवः गौतमः छन्दः गायत्री देवता अग्निः 1-6, सोमकः साहदेव्यः 7-8, अश्विनौ 9-10

अग्निर्होता नो अध्वरे वाजी सन्परि णीयते । देवो देवेषु यज्ञियः ॥ 1 ॥
 परि त्रिविष्टचध्वरं यात्यग्नी रथीरिव । आ देवेषु प्रयो दधत् ॥ 2 ॥
 परि वाजपतिः क्विरग्निर्हव्यान्यक्रमीत् । दधद्रत्नानि दाशुषे ॥ 3 ॥
 अयं यः सृञ्जये पुरो दैववाते समिध्यते । द्युमाँ अमित्रदम्भनः ॥ 4 ॥
 अस्य घा वीर ईवतोऽग्नेरीशीत् मर्त्यः । तिग्मजम्भस्य मीळहुषः ॥ 5 ॥
 तमर्वन्तं न सान्निभिरुषं न दिवः शिशुम् । मर्मृज्यन्ते दिवेदिवे ॥ 6 ॥
 बोधद्यन्मा हरिभ्यां कुमारः साहदेव्यः । अच्छा न हूत उदरम् ॥ 7 ॥
 उत त्या यजता हरीं कुमारात्साहदेव्यात् । प्रयता सद्य आ ददे ॥ 8 ॥
 एष वां देवावश्विना कुमारः साहदेव्यः । दीर्घायुरस्तु सोमकः ॥ 9 ॥
 तं युवं दैवावश्विना कुमारं साहदेव्यम् । दीर्घायुषं कृणोतन ॥ 10 ॥

(21)

16

(म.4, अनु.2)

ऋषिः वामदेवः गौतमः छन्दः त्रिष्टुप् देवता इन्द्रः

आ सत्यो यातु मघवाँ ऋजीषी द्रवन्त्वस्य हरयु उप नः ।
 तस्मा इदन्धः सुषुमा सुदक्षमिहाभिपित्वं करते गृणानः ॥ 1 ॥
 अव स्य शूराध्वनो नान्तेऽस्मिन्नो अद्य सर्वने मन्दध्यै ।
 शंसात्युक्थमुशनैव वेधाश्चिकितुषे असुर्याय मन्म ॥ 2 ॥
 क्विर्न निण्यं विदथानि साधन्वृषा यत्सेकं विपिपानो अर्चात् ।
 दिव इत्था जीजनत्सप्त कारूनहा चिच्चक्रुर्वयुना गृणन्तः ॥ 3 ॥
 स्वर्यद्वेदि सुदशीकमर्कैर्महि ज्योतीं रुरुचुर्यद्ध वस्तोः ।
 अन्धा तमांसि दुधिता विचक्षे नृभ्यश्चकार नृतमो अभिष्टौ ॥ 4 ॥
 ववक्ष इन्द्रो अमितमृजीष्युंभे आ पंप्रौ रोदसी महित्वा ।
 अतश्चिदस्य महिमा वि रेच्यभि यो विश्वा भुवना बभूव ॥ 5 ॥
 विश्वानि शक्रो नर्याणि विद्वानपो रिरेचु सखिभिर्निकामैः ।

अश्मानं चिद्ये बिभिदुर्वचोभिर्व्रजं गोमन्तमुशिजो वि वव्रुः	॥ 6 ॥
अपो वृत्रं वत्रिवांसं पराहन्प्रावत्ते वज्रं पृथिवी सचेताः	
प्राणांसि समुद्रियाण्यैनोः पतिर्भवञ्छवसा शूर धृष्णो	॥ 7 ॥
अपो यदद्रिं पुरुहूत् ददराविर्भुवत्सरमा पूर्यं ते	
स नो नेता वाजमा दर्षि भूरि गोत्रा रुजन्नङ्गिरोभिर्गृणानः	॥ 8 ॥
अच्छा क्विं नृमणो गा अभिष्टौ स्वर्षाता मघवन्नाधमानम्	
ऊतिभिस्तर्मिषणो द्युम्रहूतौ नि मायावानब्रह्मा दस्युरत	॥ 9 ॥
आ दस्युघ्ना मनसा याह्यस्तं भुवत्ते कुत्सः सख्ये निकामः	
स्वे योनौ नि षदतं सरूपा वि वां चिकित्सदत्तचिद्ध नारी	॥ 10 ॥
यासि कुत्सेन सरथमवस्युस्तोदो वार्तस्य हयोरीशानः	
ऋज्रा वाजं न गध्यं युयूषन्क्विर्यदहन्पार्याय भूषात्	॥ 11 ॥
कुत्साय शुष्णामशुषं नि बर्हीः प्रपित्वे अह्नः कुर्यवं सहस्रा	
सद्यो दस्युन्प्र मृण कुत्स्येन प्र सूरश्चक्रं वृहतादुभीके	॥ 12 ॥
त्वं पिपुं मृगयं शूशुवांसमृजिश्चने वैदथिनाय रन्धीः	
पञ्चाशत्कृष्णा नि वपः सहस्रात्कं न पुरो जरिमा वि दर्दः	॥ 13 ॥
सूर उपाके तन्वंश् दधानो वि यत्ते चेत्यमृतस्य वर्षः	
मृगो न हस्ती तविषीमुषाणः सिंहो न भीम आयुधानि बिभ्रत्	॥ 14 ॥
इन्द्रं कामा वसूयन्तो अगमन्त्स्वर्मीळहे न सर्वने चक्रानाः	
श्रवस्यवः शशमानास उक्थैरोको न रण्वा सुदशीव पुष्टिः	॥ 15 ॥
तमिद्ध इन्द्रं सुहवं हुवेम यस्ता चकार नयां पुरूणि	
यो मावते जरित्रे गध्यं चिन्मक्षू वाजं भरति स्पार्हराधाः	॥ 16 ॥
तिग्मा यदन्तरशनिः पताति कस्मिञ्चिच्छूर मुहुके जनानाम्	
घोरा यदर्यं समृतिर्भवात्यधं स्मा नस्तन्वो बोधि गोपाः	॥ 17 ॥
भुवोऽविता वामदैवस्य धीनां भुवः सखावृको वाजसातौ	
त्वामनु प्रमतिमा जगन्मोरुशंसो जरित्रे विश्वधं स्याः	॥ 18 ॥
एभिर्नृभिरिन्द्र त्वायुभिष्ट्वा मघवद्भिर्मघवन्विश्व आजौ	
द्यावो न द्युमैरभि सन्तो अर्यः क्षपो मदेम शरदश्च पूर्वीः	॥ 19 ॥
एवेदिन्द्राय वृषभाय वृष्णे ब्रह्माकर्म भृगवो न रथम्	
नू चिद्यथा नः सख्या वियोषदसन्न उग्रोऽविता तनूपाः	॥ 20 ॥
नू ष्टुत इन्द्र नू गृणान इषं जरित्रे नद्योः न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 21 ॥

ऋषिः वामदेवः गौतमः

छन्दः त्रिष्टुप् 1-14,16-21, एकपदा विराट् 15

देवता इन्द्रः

त्वं म॒हो॑ इन्द्र॒ तुभ्यं॑ ह॒ क्षा॑ अनु॒ क्षत्रं॑ म॒हना॑ मन्यत् द्यौः	
त्वं वृ॒त्रं शर्व॑सा जघन्वान्तसृजः सिन्धूरहि॑ना जग्रसानान्	॥ 1 ॥
तव॑ त्विषो॒ जनि॑मन्नेजत् द्यौ रेज॒द्भूमि॑र्भियसा स्वस्य॒ मन्योः॑	
ऋघा॑यन्त॒ सुभ्व॑ः पर्व॒तासु॑ आर्दन्धन्वानि॒ सर॑यन्त॒ आपः॑	॥ 2 ॥
भि॒नद्दि॑रिं शर्वसा॒ वज्र॑मि॒ष्णन्ना॑विष्कृण्वानः॒ सह॑सान॒ ओजः॑	
वधी॑द्वृत्रं॒ वज्र॑ेण॒ मन्द॑सानः॒ सर॑न्नापो॒ जव॑सा॒ हत॑वृष्णीः	॥ 3 ॥
सु॒वीर॑स्ते॒ जनि॑ता॒ मन्य॑त् द्यौरिन्द्र॒स्य क॑र्ता॒ स्वप॑स्तमो॒ भूत्	
य इ॑ ज॒जान॑ स्व॒र्यं सु॒वज्र॑मनपच्युतं॒ सद॑सो॒ न भूम॑	॥ 4 ॥
य एक॑ इ॒न्द्र्या॑वयति॒ प्र भू॑मा॒ राजा॑ कृष्टीनां॒ पुरु॑हूत॒ इन्द्रः॑	
स॒त्यमे॑न॒मनु॑ विश्वे॒ मद॑न्ति॒ रातिं॑ देवस्य॒ गृण॑तो॒ म॒घोनः॑	॥ 5 ॥
स॒त्रा सो॑मा॒ अभ॑वन्नस्य॒ विश्वे॑ स॒त्रा मदा॑सो॒ बृह॑तो॒ मदि॑ष्ठाः	
स॒त्राभ॑वो॒ वसु॑पतिर्वसूनां॒ दत्रे॑ विश्वा॒ अधि॑था॒ इन्द्र॑ कृष्टीः	॥ 6 ॥
त्वम॑र्धं प्रथ॒मं जा॑यमानोऽमे॒ विश्वा॑ अधि॒था इन्द्र॑ कृष्टीः	
त्वं प्र॑ति॒ प्रव॑त॒ आ॒शया॑न॒महिं॑ वज्र॑ेण॒ मघ॑वन्वि॒ वृश्चः॑	॥ 7 ॥
स॒त्राह॑णं॒ दा॒धृषिं॑ तुम्रिन्द्रं॒ म॒हाम॑पा॒रं वृ॑षभं॒ सु॒वज्र॑म्	
हन्ता॑ यो॒ वृत्रं॑ स॒नि॒तो॒त वा॑जं॒ दाता॑ म॒घानि॑ म॒घवा॑ सुरा॒धाः॑	॥ 8 ॥
अ॒यं वृ॑त॒श्चा॒तय॑ते॒ समी॑चीर्य॒ आ॒जिषु॑ म॒घवा॑ शृण्व॒ एकः॑	
अ॒यं वा॑जं॒ भर॑ति॒ यं स॒नो॒त्यस्य॑ प्रि॒यासः॑ स॒ख्ये स्या॑म	॥ 9 ॥
अ॒यं शृ॑ण्वे॒ अध॑ जयन्नु॒त घ्न॑न्नयमु॒त प्र॑ कृणुते॒ युधा॑ गाः	
य॒दा स॒त्यं कृ॑णुते॒ मन्यु॑मिन्द्रो॒ विश्वं॑ दृ॒ळ्हं भ॑यत् एज॒दस्मात्॑	॥ 10 ॥
स॒मिन्द्रो॑ गा॒ अ॒जय॑त्सं॒ हिर॑ण्य॒ा सम॑श्चि॒या म॒घवा॑ यो॒ हं पू॒र्वीः॑	
ए॒भिर्नृ॑भिर्नृत॒मो अस्य॑ शा॒कै रा॒यो वि॑भक्ता॒ संभ॑रश्च॒ वस्वः॑	॥ 11 ॥
कि॒र्यत्स्वि॑दिन्द्रो॒ अ॒ध्येति॑ मातुः॒ कि॒र्यत्पि॑तुर्ज॒नितु॑र्यो॒ ज॒जान॑	
यो अ॑स्य॒ शु॒ष्मं मु॒हुकै॑रि॒र्यति॑ वा॒तो न॑ जू॒तः स्त॒नर्य॑द्भि॒रभ्रैः॑	॥ 12 ॥
क्षि॒यन्तं॑ त्व॒मक्षि॑यन्तं॒ कृ॒णो॒तीर्य॑ति॒ रेणुं॑ म॒घवा॑ स॒मोह॑म्	
वि॒भ॒ञ्ज॒नुर॑श॒निमाँ॑इव॒ द्यौरु॑त॒ स्तो॒तारं॑ म॒घवा॑ वसौ॒ धात्॑	॥ 13 ॥
अ॒यं च॑क्रमि॒षण॑त्सूर्यस्य॒ न्ये॒तशं॑ री॒रम॑त्स॒सृमा॑णम्	
आ॒ कृ॑ष्ण॒ इ॑ जु॒हुरा॑णो॒ जि॒घर्ति॑ त्व॒चो बु॑ध्ने॒ रज॑सो॒ अ॒स्य यो॑नौ	॥ 14 ॥
अ॒सि॒क्र॒त्यां य॑ज॒मानो॑ न होता	॥ 15 ॥

गुव्यन्तु इन्द्रं सख्यायु विप्रा अश्वायन्तो वृषणं वाजयन्तः	
जनीयन्तो जनिदामक्षितोतिमा च्यावयामोऽवृते न कोशम्	॥ 16 ॥
त्राता नो बोधि ददृशान आपिरीभिख्याता मर्दिता सोम्यानाम्	
सखा पिता पितृतमः पितृणां कर्तेमु लोकमुशते वयोधाः	॥ 17 ॥
सखीयतामविता बोधि सखा गृणान इन्द्र स्तुवृते वयो धाः	
वयं ह्या ते चकृमा सुबाधं अभिः शमीभिर्महयन्त इन्द्र	॥ 18 ॥
स्तुत इन्द्रो मघवा यद्ध वृत्रा भूरीण्येको अप्रतीनि हन्ति	
अस्य प्रियो जरिता यस्य शर्मन्नकिर्देवा वारयन्ते न मर्ताः	॥ 19 ॥
एवा न इन्द्रो मघवा विरप्शी करत्सत्या चर्षणीधृदन्वा	
त्वं राजा जनुषां धेह्यस्मे अधि श्रवो माहिं न यज्ञरित्रे	॥ 20 ॥
नू ह्युत इन्द्र नू गृणान इषं जरित्रे नद्योरे न पीपेः	
अकारि ते हरिवो ब्रह्म नव्यं धिया स्याम रुथ्यः सदासाः	॥ 21 ॥

(13)

18

(म.4, अनु.2)

ऋषिः इन्द्रः 1, वामदेवः गौतमः 2,3,5,6, 8-13, वामदेवः अदिती 4, अदितिः 7 देवता वामदेवः 1,5-7, इन्द्रः 2-3,8-13, इन्द्रवामदेवौ 4	छन्दः त्रिष्टुप्
----------------------------------------------------------------------------------------------------------------------------------	------------------

अयं पन्था अनुवित्तः पुराणो यतो देवा उदजायन्त विश्वे	
अतश्चिदा जनिषीष्ट प्रवृद्धो मा मातरममुया पत्तवे कः	॥ 1 ॥
नाहमतो निरया दुर्गहैतत्तिरश्चता पार्श्वान्निर्गमाणि	
बहूनि मे अकृता कर्त्वाणि युध्यै त्वेन सं त्वेन पृच्छे	॥ 2 ॥
पुरायती मातरमन्वचष्ट न नानु गान्यनु नू गमानि	
त्वष्टुर्गृहे अपिबत्सोममिन्द्रः शतधन्यं चम्बोः सुतस्य	॥ 3 ॥
किं स ऋधक्कणवृद्यं सहस्रं मासो जभारं शरदश्च पूर्वीः	
नही न्वस्य प्रतिमानमस्त्यन्तर्जातेषुत ये जनित्वाः	॥ 4 ॥
अवृद्यमिव मन्यमाना गुहाकरिन्द्रं माता वीर्येणा न्यृष्टम्	
अथोदस्थात्स्वयमत्कं वसान् आ रोदसी अपृणाञ्जार्यमानः	॥ 5 ॥
एता अर्षन्त्यललाभवन्तीर्ऋतावरीरिव संक्रोशमानाः	
एता वि पृच्छ किमिदं भनन्ति कमापो अद्रिं परिधिं रुजन्ति	॥ 6 ॥
किमु ष्विदस्मै निविदो भनन्तेन्द्रस्यावृद्यं दिधिषन्त आपः	
ममैतान्पुत्रो महता वृधेन वृत्रं जघन्वाँ असृजद्वि सिन्धून्	॥ 7 ॥
ममञ्चन त्वा युवतिः पुरासु ममञ्चन त्वा कुषवा जुगार	

ममञ्चिदापुः शिशवे ममृड्युर्ममञ्चिदिन्द्रः सहसोदतिष्ठत्	॥ 8 ॥
ममञ्चन ते मघवन्व्यंसो निविविध्वाँ अप हनू जघान	
अधा निविद्ध उत्तरो बभूवाञ्छिरो दासस्य सं पिणग्वधेन	॥ 9 ॥
गृष्टिः संसूव स्थविरं तवागामनाधृष्यं वृषभं तुम्रमिन्द्रम्	
अरीळ्हं वृत्सं चरथाय माता स्वयं गातुं तन्व इच्छमानम्	॥ 10 ॥
उत माता महिषमन्ववेनदुमी त्वा जहति पुत्र देवाः	
अथाब्रवीद्वृत्रमिन्द्रो हनिष्यन्त्सखे विष्णो वितरं वि क्रमस्व	॥ 11 ॥
कस्ते मातरं विधवामचक्रच्छयुं कस्त्वामजिघांसञ्चरन्तम्	
कस्ते देवो अधि मर्डीक आसीद्यत्प्राक्षिणाः पितरं पादगृह्य	॥ 12 ॥
अवर्त्या शुनं आन्त्राणि पेचे न देवेषु विविदे मर्डितारम्	
अपश्यं जायाममहीयमानामधा मे श्येनो मध्वा जंभार	॥ 13 ॥

| इति तृतीयाष्टके पञ्चमोऽध्यायः समाप्तः ।

(षष्ठोऽध्यायः ॥ वर्गाः 1-30)

(11)

19

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता इन्द्रः

एवा त्वामिन्द्र वज्रिन्नत्र विश्वे देवासः सुहवास ऊमाः	
महामुभे रोदसी वृद्धमृष्वं निरेकमिद्वृणते वृत्रहत्ये	॥ 1 ॥
अवासृजन्त जिब्रयो न देवा भुवः सम्राळिन्द्र सत्ययोनिः	
अहन्नहिं परिशयान्मर्णः प्र वर्तनीररदो विश्वधैनाः	॥ 2 ॥
अतृष्णुवन्तं वियतमबुध्यमबुध्यमानं सुषुपाणमिन्द्र	
सप्त प्रति प्रवत आशयान्महिं वज्रेण वि रिणा अपर्वन्	॥ 3 ॥
अक्षोदयच्छवसा क्षाम बुध्नं वार्ण वातस्तविषीभिरिन्द्रः	
दृळ्हान्यौभ्रादुशमान् ओजोऽवाभिनत्कुभः पर्वतानाम्	॥ 4 ॥
अभि प्र दद्गुर्जनयो न गर्भं रथाइव प्र ययुः साकमद्रयः	
अतर्पयो विसृत उब्ज ऊर्मिन्त्वं वृताँ अरिणा इन्द्र सिन्धून्	॥ 5 ॥
त्वं महीमवनिं विश्वधैनां तुर्वीतये वय्याय क्षरन्तीम्	
अरमयो नमसैजदर्णः सुतरणाँ अकृणोरिन्द्र सिन्धून्	॥ 6 ॥
प्रागुवो नभन्वोरे न वक्रा ध्वसा अपिन्वद्युवतीर्हृत्तजाः	
धन्वान्यज्राँ अपृणकृषाणाँ अधोगिन्द्रः स्तर्योरे दंसुपत्नीः	॥ 7 ॥
पूर्वीरुषसः शरदश्च गूर्ता वृत्रं जघन्वाँ असृजद्वि सिन्धून्	
परिष्ठिता अतृणद्वद्धानाः सीरा इन्द्रः स्रवितवे पृथिव्या	॥ 8 ॥
वृषीभिः पुत्रमृगुवो अदानं निवेशनाद्धरिव आ जभर्थ	
व्यशन्धो अख्यदहिमाददानो निभूदुखच्छित्समरन्तु पर्व	॥ 9 ॥
प्र ते पूर्वाणि करणानि विप्राविद्धाँ आह विदुषे करांसि	
यथायथा वृष्यानि स्वगूर्तापांसि राजन्नर्याविवेषीः	॥ 10 ॥
नू ष्टु इन्द्र नू गृणान इषं जरित्रे नद्योरे न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 11 ॥

(11)

20

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता इन्द्रः

आ न इन्द्रो दूरादा न आसादभिष्टिकृदवसे यासदुग्रः	
ओजिष्ठेभिर्नृपतिर्वज्रबाहुः संगे समत्सु तुर्वणिः पृतन्यून्	॥ 1 ॥
आ न इन्द्रो हरिभिर्यात्वच्छावाचीनोऽवसे राधसे च	
तिष्ठाति वृज्जी मघवा विरुषीमं यज्ञमनु नो वाजसातौ	॥ 2 ॥

इमं यज्ञं त्वमस्माकमिन्द्र पुरो दधत्सनिष्यसि क्रतुं नः	
श्वधीव वज्रिन्त्सनये धनानां त्वया वयमर्य आजिं जयेम	॥ 3 ॥
उशत्रु षु णः सुमना उपाके सोमस्य नु सुषुतस्य स्वधावः	
पा इन्द्र प्रतिभृतस्य मध्वः समन्धसा ममदः पृष्ठ्येन	॥ 4 ॥
वि यो ररुषा ऋषिभिर्नवेभिर्वृक्षो न पृक्कः सृण्यो न जेता	
मर्यो न योषामभि मन्यमानोऽच्छा विवक्मि पुरुहूतमिन्द्रम्	॥ 5 ॥
गिरिन यः स्वतवां ऋष्व इन्द्रः सनादेव सहसे जात उग्रः	
आदता वज्रं स्थविरं न भीम उद्रेव कोशं वसुना न्यष्टम्	॥ 6 ॥
न यस्य वर्ता जनुषा न्वस्ति न राधस आमरीता मघस्य	
उद्धावृषाणस्तविषीव उग्रास्मभ्यं दद्धि पुरुहूत रायः	॥ 7 ॥
ईक्षे रायः क्षयस्य चर्षणीनामुत व्रजमपवर्तासि गोनाम्	
शिक्षानरः समित्थेषु प्रहावान्वस्वो राशिमभिनेतासि भूरिम्	॥ 8 ॥
कया तच्छृण्वे शच्या शचिष्ठो यया कृणोति मुहु का चिदृष्वः	
पुरु दाशुषे विचयिष्ठो अंहोऽथा दधाति द्रविणं जरित्रे	॥ 9 ॥
मा नो मधीरा भरा दद्धि तन्नः प्र दाशुषे दातवे भूरि यतै	॥
नव्ये देष्णे शस्ते अस्मिन्त उक्थे प्र ब्रवाम वयमिन्द्र स्तुवन्तः	॥ 10 ॥
नू ह्युत इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 11 ॥

(11)

21

(म.4, अनु.2)

ऋषिः वामदेवः गौतमः	छन्दः त्रिष्टुप्	देवता इन्द्रः
--------------------	------------------	---------------

आ यात्विन्द्रोऽवस उषं न इह स्तुतः सधमादस्तु शूरः	
वावृधानस्तविषीर्यस्य पूर्वोद्यौर्न क्षत्रमभिभूति पुष्यात्	॥ 1 ॥
तस्येदिह स्तवथ वृष्यानि तुविद्युमस्य तुविराधसो नृन्	
यस्य क्रतुर्विदुथ्योर् न सम्राट् साहान्तरुत्रो अभ्यस्ति कृष्टीः	॥ 2 ॥
आ यात्विन्द्रो दिव आ पृथिव्या मक्षू समुद्रादुत वा पुरीषात्	
स्वर्णरादवसे नो मरुत्वान्परावतो वा सदनादृतस्य	॥ 3 ॥
स्थूरस्य रायो बृहतो य ईशे तमु ष्टवाम विदथेष्विन्द्रम्	
यो वायुना जयति गोमतीषु प्र धृष्णुया नयति वस्यो अच्छ	॥ 4 ॥
उप यो नमो नमसि स्तभायन्निर्यति वाचं जनयन्वजध्वै	
ऋञ्जसानः पुरुवार उक्थैरेन्द्रं कृण्वीत् सदनेषु होता	॥ 5 ॥
धिषा यदि धिष्यन्तः सरण्यान्सदन्तो अद्रिमौशिजस्य गोहे	

आ दुरोषाः पास्त्यस्य होता यो नो महान्तसंवरणेषु वह्निः	॥ 6 ॥
सत्रा यदी भार्वरस्य वृष्णः सिषक्ति शुष्मः स्तुवते भराय	
गुहा यदीमौशिजस्य गोहे प्र यद्धिये प्रायसे मदाय	॥ 7 ॥
वि यद्वरांसि पर्वतस्य वृणवे पयोभिर्जिन्वे अपां जवांसि	
विदद्वौरस्य गव्यस्य गोहे यदी वाजाय सुध्योर् वहन्ति	॥ 8 ॥
भद्रा ते हस्ता सृकृतोत पाणी प्रयन्तारां स्तुवते राधे इन्द्र	
का ते निषक्तिः किमु नो ममत्सि किं नोदुदु हर्षसे दात्वा उ	॥ 9 ॥
एवा वस्व इन्द्रः सत्यः सम्राड्नुता वृत्रं वरिवः पूरवे कः	
पुरुष्टुत् क्रत्वा नः शग्धि रायो भक्षीय तेऽवसो दैव्यस्य	॥ 10 ॥
नू ष्टु इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रुथ्यः सदासाः	॥ 11 ॥

(11)

22

(म.4, अनु.3)

ऋषिः वामदेवः गौतमः	छन्दः त्रिष्टुप्	देवता इन्द्रः
--------------------	------------------	---------------

यत्र इन्द्रो जुजुषे यच्च वष्टि तन्नो महान्करति शुष्या चित्	
ब्रह्म स्तोमं मघवा सोममुक्था यो अश्मानं शवसा बिभ्रदेति	॥ 1 ॥
वृषा वृषन्धिं चतुरश्रिमस्यत्रुगो बाहुभ्यां नृतमः शचीवान्	
श्रिये परुष्णीमुषमाण ऊर्णा यस्याः पर्वाणि सख्याय विव्ये	॥ 2 ॥
यो देवो देवतमो जायमानो महो वाजेभिर्महद्भिश्च शुष्मैः	
दधानो वज्रं बाह्वोरुशन्तं द्याममेन रेजयत्प्र भूमं	॥ 3 ॥
विश्वा रोधांसि प्रवतश्च पूर्वीद्यौर्ऋष्वाञ्जनिमन्नेजत् क्षाः	
आ मात्रा भरति शुष्या गोर्नृवत्परिज्मन्नोनुवन्त वाताः	॥ 4 ॥
ता तू तं इन्द्र महतो महानि विश्वेष्वित्सर्वनेषु प्रवाच्या	॥
यच्छूर धृष्णो धृषता दधृष्वानहिं वज्रेण शवसाविवेषीः	॥ 5 ॥
ता तू तै सत्या तुविनृम्णा विश्वा प्र धेनवः सिस्रते वृष्णा ऊर्ध्वः	
अथा ह त्वद्वृषमणो भियानाः प्रसिन्धवो जवसा चक्रमन्त	॥ 6 ॥
अत्राहं ते हरिवस्ता उ देवीरवोभिरिन्द्र स्तवन्त स्वसारः	
यत्सीमनु प्र मुचो बद्धधाना दीर्घामनु प्रसितिं स्यन्दुयध्यै	॥ 7 ॥
पिपीळे अंशुर्मद्यो न सिन्धुरा त्वा शमी शशमानस्य शक्तिः	
अस्मद्र्यक्शुशुचानस्य यम्या आशुर्न रश्मिं तुव्योर्जसं गोः	॥ 8 ॥
अस्मे वर्षिष्ठा कृणुहि ज्येष्ठा नृम्णानि सत्रा सहुरे सहांसि	
अस्मभ्यं वृत्रा सुहनानि रन्धि जहि वर्धर्वनुषो मर्त्यस्य	॥ 9 ॥

अस्माकमित्सु शृणुहि त्वमिन्द्रास्मभ्यं चित्रां उप माहि वाजान् ।
 अस्मभ्यं विश्वा इषणः पुरंधीरस्माकं सु मघवन्बोधि गोदाः ॥ 10 ॥
 नू घृत इन्द्र नू गृणान इषं जरित्रे नद्योर् न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ॥ 11 ॥

(11)

23

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रः 1-7,11,

इन्द्रः ऋतदेवता वा 8-10

कथा महामवृधत्कस्य होतुर्यज्ञं जुषाणो अभि सोममूधः ।
 पिबन्नुशानो जुषमाणो अन्धो ववक्ष ऋष्वः शुचते धनाय ॥ 1 ॥
 को अस्य वीरः सधुमादमापु समानंश सुमतिभिः को अस्य ।
 कदस्य चित्रं चिकित्ते कदूती वृधे भुवच्छशमानस्य यज्योः ॥ 2 ॥
 कथा शृणोति ह्यमानमिन्द्रः कथा शृण्वन्नवसामस्य वेद ।
 का अस्य पूर्वीरुपमातयो ह कथैनमाहुः पपुरिं जरित्रे ॥ 3 ॥
 कथा सबाधः शशमानो अस्य नशदभि द्रविणं दीध्यानः ।
 देवो भुवन्नवेदा म ऋतानां नमो जगृभ्वां अभि यज्जुजोषत् ॥ 4 ॥
 कथा कदस्या उषसो व्युष्टौ देवो मर्तस्य सुख्यं जुजोष ।
 कथा कदस्य सुख्यं सखिभ्यो ये अस्मिन्कामं सुयुजं ततस्त्रे ॥ 5 ॥
 किमादमत्रं सुख्यं सखिभ्यः कदा नु ते भ्रात्रं प्र ब्रवाम ।
 श्रिये सुदृशो वपुरस्य सर्गाः स्वर्णं चित्रतममिष आ गोः ॥ 6 ॥
 द्रुहं जिघांसन्ध्वरसमनिन्द्रां तेतिके तिग्मा तुजसे अनीका ।
 ऋणा चिद्यत्र ऋण्या न उग्रो दूरे अज्ञाता उषसो बबाधे ॥ 7 ॥
 ऋतस्य हि शुरुधुः सन्ति पूर्वोऋतस्य धीतिर्वीजिनानि हन्ति ।
 ऋतस्य श्लोको बधिरा ततर्द कर्णा बुधानः शुचमान आयोः ॥ 8 ॥
 ऋतस्य दृळ्हा धरुणानि सन्ति पुरूणि चन्द्रा वपुषे वपूषि ।
 ऋतेन दीर्घमिषणन्त पृक्ष ऋतेन गाव ऋतमा विवेशुः ॥ 9 ॥
 ऋतं यैमान ऋतमिद्वनोत्यृतस्य शुष्मस्तुरया उं गव्युः ।
 ऋताय पृथ्वी बहुले गभीरे ऋताय धेनू परमे दुहाते ॥ 10 ॥
 नू घृत इन्द्र नू गृणान इषं जरित्रे नद्योर् न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ॥ 11 ॥

ऋषिः वामदेवः गौतमः

छन्दः त्रिष्टुप् 1-9,11, अनुष्टुप् 10

देवता इन्द्रः

का सुष्टुतिः शर्वसः सूनुमिन्द्रमर्वाचीनं राधस आ ववर्तत्	
दुर्दिहि वीरो गृणते वसूनि स गोपतिर्निषिधां नो जनासः	॥ 1 ॥
स वृत्रहत्ये हव्यः स ईड्यः स सुष्टुत् इन्द्रः सत्यराधाः	
स यामन्ना मघवा मर्त्याय ब्रह्मण्यते सुष्वये वरिवो धात्	॥ 2 ॥
तमिन्नरो वि ह्वयन्ते समीके रिरिक्कांसस्तन्वः कृण्वत् त्राम्	
मिथो यत्यागमुभयासो अगम्नरस्तोकस्य तनयस्य सातौ	॥ 3 ॥
क्रतूयन्ति क्षितयो योग उग्राशुषाणासौ मिथो अर्णसातौ	
सं यद्विशोऽववृत्रन्त युध्मा आदिन्नेम इन्द्रयन्ते अभीके	॥ 4 ॥
आदिद्ध नेम इन्द्रियं यजन्त आदित्पुक्तिः पुरोळाशं रिरिच्यात्	
आदित्सोमो वि पृच्यादसुष्वीनादिज्जुजोष वृषभं यजध्वै	॥ 5 ॥
कृणोत्यस्मै वरिवो य इत्थेन्द्राय सोममुशते सुनोति	
सुध्रीचीनेन मनसाविवेनन्तमित्सखायं कृणुते समत्सु	॥ 6 ॥
य इन्द्राय सुनवत्सोममद्य पचात्पुक्तीरुत भृञ्जाति धानाः	
प्रति मनायोरुचथानि हर्यन्तस्मिन्दधृषणं शुष्मिन्द्रः	॥ 7 ॥
यदा समर्यं व्यचेदघावा दीर्घं यदाजिमभ्यख्यदर्यः	
अचिक्रददृषणं पत्यच्छा दुरोण आ निशितं सोमसुद्धिः	॥ 8 ॥
भूर्यसा वस्त्रमचरत्कनीयोऽविक्रीतो अकानिषं पुनर्यन्	
स भूर्यसा कनीयो नारिरेचीद्वीना दक्षा वि दुहन्ति प्र वाणम्	॥ 9 ॥
क इमं दशभिर्ममेन्द्रं क्रीणाति धेनुभिः	
यदा वृत्राणि जङ्घनदथैनं मे पुनर्ददत्	॥ 10 ॥
नू ष्टु इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 11 ॥

ऋषिः वामदेवः गौतमः

छन्दः त्रिष्टुप्

देवता इन्द्रः

को अद्य नर्यो देवकाम उशान्निन्द्रस्य सुख्यं जुजोष	
को वा महेऽवसे पार्याय समिद्धे अग्रौ सुतसौम ईद्वे	॥ 1 ॥
को नानाम् वचसा सोम्याय मनायुर्वा भवति वस्त उस्नाः	
क इन्द्रस्य युज्यं कः सखित्वं को भ्रात्रं वष्टि क्वये क ऊती	॥ 2 ॥
को देवानामवो अद्या वृणीते क आदित्यां अदितिं ज्योतिरीद्वे	
कस्याश्विनाविन्द्रो अग्निः सुतस्यांशोः पिबन्ति मनसाविवेनम्	॥ 3 ॥

तस्मा अग्निर्भारतः शर्मं यंसुज्ज्योक्पश्यात्सूर्यमुच्चरन्तम्	
य इन्द्राय सुनवामेत्याह नरे नर्याय नृत्तमाय नृणाम्	॥ 4 ॥
न तं जिंनन्ति ब्रह्मो न दुभ्रा उर्वस्मा अर्दितिः शर्मं यंसत्	
प्रियः सुकृत्प्रिय इन्द्रे मनायुः प्रियः सुप्रावीः प्रियो अस्य सोमी	॥ 5 ॥
सुप्राव्यः प्राशुषाळेष वीरः सुष्वैः पक्तिं कृणुते केवलेन्द्रः	
नासुष्वेरापिर्न सखा न जामिर्दुष्प्राव्योऽवहन्तेदवाचः	॥ 6 ॥
न रेवता पृणिना सख्यमिन्द्रोऽसुन्वता सुतपाः सं गृणीते	
आस्य वेदः खिदति हन्ति नृग्रं वि सुष्वये पक्तये केवलो भूत्	॥ 7 ॥
इन्द्रं परेऽवरे मध्यमासु इन्द्रं यान्तोऽवसितासु इन्द्रम्	
इन्द्रं क्षियन्त उत युध्यमाना इन्द्रं नरो वाजयन्तो हवन्ते	॥ 8 ॥

(7)

26

(म.4, अनु.3)

ऋषिः वामदेवः गौतमः, इन्द्रः वा 1-3,	छन्दः त्रिष्टुप्	देवता इन्द्रः आत्मा वा 1-3,
श्येनः (सुपर्णात्मा ब्रह्म) 4-7		

अहं मनुरभवं सूर्यश्चाहं कक्षीवाँ ऋषिरस्मि विप्रः	
अहं कुत्समार्जुनेयं नृञ्जेऽहं कविरुशाना पश्यता मा	॥ 1 ॥
अहं भूमिमददामार्यायाहं वृष्टिं दाशुषे मर्त्याय	
अहमपो अनयं वावशाना मम देवासो अनु केतमायन्	॥ 2 ॥
अहं पुरो मन्दसानो व्यैरं नव साकं नवतीः शम्बरस्य	
शततमं वेश्यं सर्वताता दिवोदासमतिथिग्वं यदावम्	॥ 3 ॥
प्र सु ष विभ्यो मरुतो विरस्तु प्र श्येनः श्येनेभ्य आशुपत्वा	
अचक्रया यत्स्वधया सुपर्णो हव्यं भरन्मनवे देवजुष्टम्	॥ 4 ॥
भरद्यदि विरतो वेर्विजानः पथोरुणा मनोजवा असर्जि	
तूयं ययौ मधुना सोम्येनोत श्रवो विविदे श्येनो अत्र	॥ 5 ॥
ऋजीपी श्येनो ददमानो अंशुं परावतः शकुनो मन्द्रं मदम्	
सोमं भरद्वाहहाणो देवावान्दिवो अमुष्मादुत्तरादादाय	॥ 6 ॥
आदाय श्येनो अभरत्सोमं सहस्रं सवाँ अयुतं च साकम्	
अत्रा पुरंधिरजहादरातीर्मदे सोमस्य मूरा अमूरः	॥ 7 ॥

(5)

27

(म.4, अनु.3)

ऋषिः वामदेवः गौतमः

छन्दः त्रिष्टुप् 1-4, शकरी 5 देवता श्येनः 1-4, श्येनः इन्द्रः वा 5

गर्भे नु सन्नन्वेषामवेदमहं देवानां जनिमानि विश्वा	
शतं मा पुर आर्यसीररक्षन्नध श्येनो ज्वसा निरदीयम्	1
न घा स मामप जोषं जभाराभीमासु त्वक्षसा वीर्येण	
ईर्मा पुरंधिरजहादरातीरुत वाताँ अतरच्छूशुवानः	2
अव यच्छ्येनो अस्वनीदध द्योर्वि यद्यदि वात ऊहुः पुरंधिम्	
सृजद्यदस्मा अव ह क्षिपज्यां कृशानुरस्ता मनसा भुरण्यन्	3
ऋजिप्य ईमिन्द्रावतो न भुज्युं श्येनो जभार बृहतो अधि ष्णोः	
अन्तः पंतत्पत्र्यस्य पूर्णमधु यामनि प्रसितस्य तद्वेः	4
अध श्वेतं कुलशं गोभिरक्तमापिप्यानं मघवा शुक्रमन्धः	
अध्वर्युभिः प्रयतं मध्वो अग्रमिन्द्रो मदाय प्रति	
धृत्पिबध्यै शूरो मदाय प्रति धृत्पिबध्यै	5

(5)

28

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रासोमौ (इन्द्रः वा)

त्वा युजा तव तत्सोम सुख्य इन्द्रो अपो मनवे सुस्रुतस्कः	
अहन्नहिमरिणात्सप्त सिन्धूनपावृणोदपिहितेव खानि	1
त्वा युजा नि खिदत्सूर्यस्येन्द्रश्चक्रं सहसा सद्य इन्दो	
अधि ष्णुना बृहता वर्तमानं महो द्रुहो अप विश्वायु धायि	2
अहनिन्द्रो अदहदग्रिरिन्दो पुरा दस्युन्मध्यंदिनादभीके	
दुर्गे दुरोणे क्रत्वा न यातां पुरू सहस्रा शर्वा नि बर्हीत्	3
विश्वस्मात्सीमधुमाँ इन्द्र दस्युन्विशो दासीरकृणोरप्रशस्ताः	
अबाधेथाममृणतं नि शत्रूनविन्देथामपचितिं वधत्रैः	4
एवा सत्यं मघवाना युवं तदिन्द्रश्च सोमोर्वमश्व्यं गोः	
आददत्तमपिहितान्यश्ना रिरिचथुः क्षाश्चित्तृदाना	5

(5)

29

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रः

आ नः स्तुत उप वाजेभिरूती इन्द्र याहि हरिभिर्मन्दसानः	
तिरश्चिदुर्यः सर्वना पुरूण्याङ्गुषेभिर्गृणानः सत्यराधाः	1
आ हि ष्मा याति नर्याश्चिकित्वान्हूयमानः सोतृभिरुप यज्ञम्	
स्वश्वो यो अभीरुर्मन्यमानः सुष्वाणेभिर्मदति सं ह वीरैः	2

श्रावयेदस्य कर्णां वाज्यध्वै जुष्टामनु प्र दिशं मन्द्यध्वै	
उद्धावृषाणो राधसे तुविष्मान्करं इन्द्रः सुतीर्थाभयं च	3
अच्छा यो गन्ता नाधमानमूती इत्था विप्रं हवमानं गृणन्तम्	
उप त्मनि दधानो धुर्यांशून्सहस्राणि शतानि वज्रबाहुः	4
त्वोतासो मघवन्निन्द्र विप्रा वयं ते स्याम सूरयो गृणन्तः	
भेजानासौ बृहद्विवस्य राय आकाय्यस्य दावने पुरुक्षोः	5

(24)

30

(म.4, अनु.3)

ऋषिः वामदेवः गौतमः	छन्दः गायत्री 1-7,9-23, अनुष्टुप् 8,24	देवता इन्द्रः 1-8,12-24,
इन्द्रोषसौ 9-11		

नकिरिन्द्र त्वदुत्तरो न ज्यायाँ अस्ति वृत्रहन्	नकिरेवा यथा त्वम्	1
सत्रा ते अनु कृष्टयो विश्वा चक्रेवं वावृतुः	सत्रा महां असि श्रुतः	2
विश्वे चनेदुना त्वा देवास इन्द्र युयुधुः	यदहा नक्तुमातिरः	3
यत्रोत बाधितेभ्यश्चक्रं कुत्साय युध्यते	मुषाय इन्द्र सूर्यम्	4
यत्र देवाँ ऋघायतो विश्वाँ अयुध्य एक इत्	त्वमिन्द्र वनूरहन्	5
यत्रोत मर्त्याय कमरिणा इन्द्र सूर्यम्	प्रावः शचीभिरेतशम्	6
किमादुतासि वृत्रहन्मघवन्मन्युमत्तमः	अत्राह दानुमातिरः	7
एतद्घेदुत वीर्यंमिन्द्रं चकर्थ पौंस्यम्	स्त्रियं यदुर्हणायुवं वधीर्दुहितरं दिवः	8
दिवश्चिद्घा दुहितरं महान्महीयमानाम्	उषासमिन्द्र सं पिणक्	9
अपोषा अनसः सरत्संपिष्टादहं बिभ्युषी	नि यत्सीं शिश्रथदृषा	10
एतदस्या अनः शये सुसंपिष्टं विपाश्या	ससारं सीं परावतः	11
उत सिन्धुं विबाल्यं वितस्थानामधि क्षमि	परिं ष्टा इन्द्र मायया	12
उत शुष्णास्य धृष्णुया प्र मृक्षो अभि वेदनम्	पुरो यदस्य संपिणक्	13
उत दासं कौलितरं बृहतः पर्वतादधि	अवाहन्निन्द्र शम्बरम्	14
उत दासस्य वर्चिनः सहस्राणि शतावधीः	अधि पञ्च प्रधीरिव	15
उत त्यं पुत्रमगुवः परावृक्तं शतक्रतुः	उक्थेष्विन्द्र आभजत्	16
उत त्या तुर्वशायदू अस्नातारा शचीपतिः	इन्द्रो विद्वान् अपारयत्	17
उत त्या सद्य आर्यां सुरयोरिन्द्र पारतः	अर्णांचित्ररथावधीः	18
अनु द्वा जहिता नयोऽन्धं श्रोणं च वृत्रहन्	न तत्ते सुप्रमष्टवे	19
शतमशमन्मयीनां पुरामिन्द्रो व्यास्यत्	दिवोदासाय दाशुषे	20
अस्वापयद्वभीतये सहस्रा त्रिंशत् हथैः	दासानामिन्द्रो मायया	21
स घेदुतासि वृत्रहन्समान इन्द्र गोपतिः	यस्ता विश्वानि चिच्युषे	22

उत नूनं यदिन्द्रियं करिष्या इन्द्र पौंस्यम् । अद्या नकिष्टदा मिनत् ॥ 23 ॥

वामं वामं त आदुरे देवो ददात्वयमा । वामं पूषा वामं भगो वामं देवः करूळती ॥ 24 ॥

(15)

31

(म.4, अनु.3)

ऋषिः वामदेवः गौतमः

छन्दः गायत्री 1-2,4-15, पादनिचृत् गायत्री 3

देवता इन्द्रः

कया नश्चित्र आ भुवदूती सदावृधः सखा । कया शचिष्ठया वृता ॥ 1 ॥

कस्त्वा सत्यो मदानां मंहिष्ठो मत्सुदन्धसः । दृळ्हा चिदारुजे वसु ॥ 2 ॥

अभी षु णः सखीनामविता जरितृणाम् । शतं भवास्यूतिभिः ॥ 3 ॥

अभी न आ ववृत्स्व चक्रं न वृत्तमर्वतः । नियुद्धिश्चर्षणीनाम् ॥ 4 ॥

प्रवता हि क्रतूनामा हा पदेव गच्छसि । अभक्षि सूर्ये सचा ॥ 5 ॥

सं यत्त इन्द्र मन्यवः सं चक्राणि दधन्विरे । अध त्वे अध सूर्ये ॥ 6 ॥

उत स्मा हि त्वामाहुरिन्मघवानं शचीपते । दातारमविदीधयुम् ॥ 7 ॥

उत स्मा सद्य इत्परि शशमानाय सुन्वते । पुरु चिन्महसे वसु ॥ 8 ॥

नहि ष्मा ते शतं चन राधो वरन्त आमुरः । न च्यौत्वानि करिष्यतः ॥ 9 ॥

अस्माँ अवन्तु ते शतमस्मान्सहस्रमूतयः । अस्मान्विश्वा अभिष्टयः ॥ 10 ॥

अस्माँ इहा वृणीष्व सख्याय स्वस्तये । महो राये दिवित्मते ॥ 11 ॥

अस्माँ अविद्धि विश्वहेन्द्र राया परीणसा । अस्मान्विश्वाभिरूतिभिः ॥ 12 ॥

अस्मभ्यं ताँ अपा वृधि ब्रजाँ अस्तेव गोमतः । नवाभिरिन्द्रोतिभिः ॥ 13 ॥

अस्माकं धृष्णुया रथोँ द्युमाँ इन्द्रानपच्युतः । गव्युरंश्चयुरीयते ॥ 14 ॥

अस्माकमुत्तमं कृधि श्रवोँ देवेषु सूर्य । वर्षिष्ठं द्यामिवोपरि ॥ 15 ॥

(24)

32

(म.4, अनु.3)

ऋषिः वामदेवः गौतमः

छन्दः गायत्री

देवता इन्द्रः 1-22, इन्द्राश्वौ 23-24

आ तू न इन्द्र वृत्रहन्नस्माकमर्धमा गहि । महान्महीभिरूतिभिः ॥ 1 ॥

भूमिश्चिद्धासि तूतुजिरा चित्र चित्रिणीष्वा । चित्रं कृणोष्युतये ॥ 2 ॥

दुभ्रेभिश्चिच्छशीयांसं हंसि ब्राधन्तमोजसा । सखिभिर्ये त्वे सचा ॥ 3 ॥

व्यमिन्द्र त्वे सचा व्यं त्वाभि नौनुमः । अस्माँअस्माँ इदुदेव ॥ 4 ॥

स नश्चित्राभिरद्विवोऽनवद्याभिरूतिभिः । अनाधृष्टाभिरा गहि ॥ 5 ॥

भूयामो षु त्वावतः सखाय इन्द्र गोमतः । युजो वाजाय घृष्वये ॥ 6 ॥

त्वं ह्येक ईशिष इन्द्र वाजस्य गोमतः । स नो यन्धि महीमिषम् ॥ 7 ॥

न त्वा वरन्ते अन्यथा यदित्ससि स्तुतो मघम् । स्तोतृभ्य इन्द्र गिर्वणः ॥ 8 ॥

अभि त्वा गोतमा गिरानूषत् प्र दावने । इन्द्र वाजाय घृष्वये ॥ 9 ॥

प्र ते वोचाम वीर्यां३ या मन्दसान आरुजः	पुरो दासीरुभीत्य	॥ 10 ॥
ता ते गृणन्ति वेधसो यानि चकर्थ पौस्या	सुतेष्विन्द्र गिर्वणः	॥ 11 ॥
अवीवृधन्त गोतमा इन्द्र त्वे स्तोमवाहसः	एषु धा वीरवृद्यशः	॥ 12 ॥
यच्चिद्धि शश्वतामसीन्द्र साधारणस्त्वम्	तं त्वा वयं हवामहे	॥ 13 ॥
अर्वाचीनो वसो भवास्मे सु मत्स्वान्धसः	सोमानामिन्द्र सोमपाः	॥ 14 ॥
अस्माकं त्वा मतीनामा स्तोमं इन्द्र यच्छतु	अर्वागा वर्तया हरी	॥ 15 ॥
पुरोळाशं च नो घसो ज्योषयासे गिरश्च नः	वधूयुरिव योषणाम्	॥ 16 ॥
सहस्रं व्यतीनां युक्तानामिन्द्रमीमहे	शतं सोमस्य खुर्यः	॥ 17 ॥
सहस्रां ते शता वयं गवामा च्यावयामसि	अस्मत्रा राध एतु ते	॥ 18 ॥
दशं ते कलशानां हिरण्यानामधीमहि	भूरिदा असि वृत्रहन्	॥ 19 ॥
भूरिदा भूरि देहि नो मा दुभ्रं भूर्या भर	भूरि घेदिन्द्र दित्ससि	॥ 20 ॥
भूरिदा ह्यसि श्रुतः पुरुत्रा शूर वृत्रहन्	आ नो भजस्व राधसि	॥ 21 ॥
प्र ते बभ्रू विचक्षणं शंसामि गोषणो नपात्	माभ्यां गा अनुं शिश्रथः	॥ 22 ॥
कनीनकेव विद्रधे नवे द्रुपदे अर्भके	बभ्रू यामेषु शोभेते	॥ 23 ॥
अरं म उस्रयाम्णेऽरमनुस्रयाम्णे	बभ्रू यामेष्वसिधा	॥ 24 ॥

॥ इति तृतीयाष्टके षष्ठोऽध्यायः समाप्तः ॥

(सप्तमोऽध्यायः ॥ वर्गः 1-27)

(11)

33

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता ऋभवः
--------------------	------------------	------------

प्र ऋभुभ्यो दूतमिव वार्चमिष्य उपस्तिरे श्वैतरीं धेनुमीळे	
ये वार्तजूतास्तरणिभिरेवैः परि द्यां सृद्यो अपसो बभूवुः	॥ 1 ॥
यदारुमक्रं ऋभवः पितृभ्यां परिविष्टी वेषणा दुंसनाभिः	
आदिद्वेवानामुप सख्यमायन्धीरासः पुष्टिमवहन्मनायै	॥ 2 ॥
पुनर्ये चक्रुः पितरा युवाना सना यूपैव जरुणा शयाना	
ते वाजो विभ्वाँ ऋभुरिन्द्रवन्तो मधुप्सरसो नोऽवन्तु यज्ञम्	॥ 3 ॥
यत्संवत्समृभवो गामरक्षन्त्यत्संवत्समृभवो मा अर्पिशन्	
यत्संवत्समभरन्भासो अस्यास्ताभिः शमीभिरमृतत्वमाशुः	॥ 4 ॥
ज्येष्ठ आह चमसा द्वा करेति कनीयान्त्रीन्कृणवामेत्याह	
कनिष्ठ आह चतुरस्करेति त्वष्ट ऋभवस्तत्पनयद्वचो वः	॥ 5 ॥
सत्यमूचुर्नर एवा हि चक्रुरनु स्वधामृभवो जग्मुरेताम्	
विभ्राजमानांश्चमसाँ अहेवावेनत्त्वष्टा चतुरो ददृश्वान्	॥ 6 ॥
द्वादश दून्यदगौहस्यातिथ्ये रणं ऋभवः सुसन्तः	
सुक्षेत्राकृण्वन्ननयन्त सिन्धून्धन्वातिष्ठिन्नोषधीर्निग्रमापः	॥ 7 ॥
रथं ये चक्रुः सुवृत्तं नरेष्ठां ये धेनुं विश्वजुवं विश्वरूपाम्	
त आ तक्षन्त्वृभवो रयिं नः स्ववसः स्वपसः सुहस्ताः	॥ 8 ॥
अपो ह्येषामजुषन्त देवा अभि क्रत्वा मनसा दीध्यानाः	
वाजो देवानामभवत्सुकर्मन्द्रस्य ऋभुक्षा वरुणस्य विभ्वाँ	॥ 9 ॥
ये हरी मेधयोक्था मदन्त इन्द्राय चक्रुः सुयुजा ये अश्वा	
ते रायस्पोषं द्रविणान्यस्मे धत्त ऋभवः क्षेमयन्तो न मित्रम्	॥ 10 ॥
इदाहः पीतिमुत वो मदं धुर्न ऋते श्रान्तस्य सख्याय देवाः	
ते नूनमस्मे ऋभवो वसूनि तृतीयै अस्मिन्सवने दधात	॥ 11 ॥

(11)

34

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता ऋभवः
--------------------	------------------	------------

ऋभुर्विभ्वा वाज इन्द्रो नो अच्छेमं यज्ञं रत्नधयोप यात	
इदा हि वो धिषणा देव्यह्वामधात्पीतिं सं मदा अगमता वः	॥ 1 ॥
विदानासो जन्मनो वाजरत्ना उत ऋतुभिर्ऋभवो मादयध्वम्	
सं वो मदा अगमत् सं पुरंधिः सुवीरामस्मे रयिमेरयध्वम्	॥ 2 ॥

अयं वो यज्ञ ऋभवोऽकारि यमा मनुष्वत्प्रदिवो दधिध्वे	
प्र वोऽच्छा जुजुषाणासो अस्थुरभूत् विश्वे अग्रियोत् वाजाः	3
अभूद् वो विधत्ते रत्नधेयमिदा नरो दाशुषे मर्त्याय	
पिबन्त वाजा ऋभवो दुदे वो महि तृतीयं सर्वन् मदाय	4
आ वाजा यातोप न ऋभुक्षा महो नरो द्रविणसो गृणानाः	
आ वः पीतयोऽभिपित्वे अह्नामिमा अस्तं नवस्वइव गमन्	5
आ नपातः शवसो यातनोपेमं यज्ञं नमसा हूयमानाः	
सृजोषसः सूरयो यस्य च स्थ मध्वः पात रत्नधा इन्द्रवन्तः	6
सृजोषा इन्द्र वरुणेन सोमं सृजोषाः पाहि गिर्वणो मरुद्भिः	
अग्रेपाभिर्ऋतुपाभिः सृजोषाः ग्रास्पतीभी रत्नधाभिः सृजोषाः	7
सृजोषस आदित्यैर्मादयध्वं सृजोषस ऋभवः पर्वतेभिः	
सृजोषसो दैव्येना सवित्रा सृजोषसः सिन्धुभी रत्नधेभिः	8
ये अश्विना ये पितरा य ऊती धेनुं तत्क्षुर्ऋभवो ये अश्वो	
ये असंत्रा य ऋधग्रोदसी ये विभ्वो नरः स्वपत्यानि चक्रुः	9
ये गोमन्तं वाजवन्तं सुवीरं रयिं धत्थ वसुमन्तं पुरुक्षुम्	
ते अग्रेपा ऋभवो मन्दसाना अस्मे धत्त ये च रातिं गृणन्ति	10
नापाभूत् न वोऽतीतृषामानिःशस्ता ऋभवो यज्ञे अस्मिन्	
समिन्द्रेण मदथ सं मरुद्भिः सं राजभी रत्नधेयाय देवाः	11

(9)

35

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता ऋभवः
--------------------	------------------	------------

इहोप यात शवसो नपातः सौधन्वना ऋभवो मापं भूत्	
अस्मिन्हि वः सर्वने रत्नधेयं गमन्त्विन्द्रमनु वो मदासः	1
आगन्तृभूणामिह रत्नधेयमभूत्सोमस्य सुषुतस्य पीतिः	
सुकृत्यया यत्स्वपस्यया च्चं एकं विचक्र चमसं चतुर्धा	2
व्यकृणोत् चमसं चतुर्धा सखे वि शिक्षेत्यब्रवीत्	
अथैत वाजा अमृतस्य पन्थां गणं देवानामृभवः सुहस्ताः	3
किंमयः स्विच्चमस एष आसु यं काव्येन चतुरो विचक्र	
अथा सुनुध्वं सर्वन् मदाय पात ऋभवो मधुनः सोम्यस्य	4
शच्याकर्त पितरा युवाना शच्याकर्त चमसं देवपानम्	
शच्या हरी धनुतरावतष्टेन्द्रवाहावृभवो वाजरत्नाः	5
यो वः सुनोत्यभिपित्वे अह्नां तीव्रं वाजासुः सर्वन् मदाय	
तस्मै रयिमृभवः सर्ववीरमा तक्षत वृषणो मन्दसानाः	6

प्रातः सुतमपिबो हर्यश्च माध्यंदिनं सर्वनं केवलं ते	
समृभुभिः पिबस्व रत्नधेभिः सखीर्याँ इन्द्र चकृषे सुकृत्या	॥ 7 ॥
ये देवासो अभवता सुकृत्या श्येनाइवेदधिं दिवि निषेद	
ते रत्नं धात शवसो नपातः सौधन्वना अभवतामृतासः	॥ 8 ॥
यत्तृतीयं सर्वनं रत्नधेयमकृणुध्वं स्वपस्या सुहस्ताः	
तदृभवः परिषिक्तं व एतत्सं मदेभिरिन्द्रियेभिः पिबध्वम्	॥ 9 ॥

(9)

36

(म.4, अनु.4)

ऋषिः वामदेवः गौतमः

छन्दः जगती 1-8, त्रिष्टुप् 9

देवता ऋभवः

अनुश्वो जातो अनभीशुरुक्थ्योऽं रथस्त्रिचक्रः परि वर्तते रजः	
महत्तद्वो देव्यस्य प्रवाचनं द्यामृभवः पृथिवीं यच्च पुष्यथ	॥ 1 ॥
रथं चे चक्रुः सुवृतं सुचेतसोऽविह्वरन्तं मनसस्परि ध्याया	
ताँ ऊ न्वस्य सर्वनस्य पीतय आ वो वाजा ऋभवो वेदयामसि	॥ 2 ॥
तद्वो वाजा ऋभवः सुप्रवाचनं देवेषु विभ्वो अभवन्महित्वनम्	
जित्री यत्सन्ता पितरा सनाजुरा पुनर्युवाना चरथाय तक्षथ	॥ 3 ॥
एकं वि चक्र चमसं चतुर्वयं निश्चर्मणो गामरिणीत धीतिभिः	
अथा देवेष्वमृतत्वमानश श्रुष्टी वाजा ऋभवस्तद्व उक्थ्यम्	॥ 4 ॥
ऋभुतो रयिः प्रथमश्रवस्तमो वाजश्रुतासो यमजीजनन्नरः	
विभ्वत्तष्टो विदथेषु प्रवाच्यो यं देवासोऽवथा स विचर्षणिः	॥ 5 ॥
स वाज्यर्वा स ऋषिर्वचस्यया स शूरो अस्ता पृतनासु दुष्टरः	
स रायस्पोषं स सुवीर्यं दधे यं वाजो विभ्वो ऋभवो यमाविषुः	॥ 6 ॥
श्रेष्ठं वः पेशो अधि धायि दर्शतं स्तोमो वाजा ऋभवस्तं जुजुष्टन	
धीरासो हि ष्टा कवयो विपश्चितस्तान्व एना ब्रह्मणा वेदयामसि	॥ 7 ॥
यूयमस्मभ्यं धिषणाभ्यस्परि विद्वांसो विश्वा नर्याणि भोजना	
द्युमन्तं वाजं वृषशुष्ममुत्तममा नो रयिमृभवस्तक्षता वयः	॥ 8 ॥
इह प्रजामिह रयिं रराणा इह श्रवो वीरवत्तक्षता नः	
येन वयं चितयेमात्यन्यान्तं वाजं चित्रमृभवो ददा नः	॥ 9 ॥

(8)

37

(म.4, अनु.4)

ऋषिः वामदेवः गौतमः

छन्दः त्रिष्टुप् 1-4, अनुष्टुप् 5-8

देवता ऋभवः

उप नो वाजा अध्वरमृभुक्षा देवा यात पृथिभिर्देवयानैः	
यथा यज्ञं मनुषो विक्ष्वाऽसु दधिध्वे रण्वाः सुदिनेष्वह्वाम्	॥ 1 ॥
ते वो हृदे मनसे सन्तु यज्ञा जुष्टासो अद्य घृतनिर्णिजो गुः	
प्र वः सुतासो हरयन्त पूर्णाः क्रत्वे दक्षाय हर्षयन्त पीताः	॥ 2 ॥

त्र्युदायं देवहितं यथा वः स्तोमो वाजा ऋभुक्षणो दुदे वः	
जुह्वे मनुष्वदुपरासु विक्षु युष्मे सचा बृहद्विवेषु सोमम्	3
पीवोअश्वाः शुचद्रथा हि भूतार्यःशिप्रा वाजिनः सुनिष्काः	
इन्द्रस्य सूनो शवसो नपातोऽनु वश्चेत्यग्रियं मदीय	4
ऋभुर्मभुक्षणो रयिं वाजे वाजिन्तमं युजम्	
इन्द्रस्वन्तं हवामहे सदासातममश्विनम्	5
सेदभवो यमवथ यूयमिन्द्रश्च मर्त्यम्	
स धीभिरस्तु सर्निता मेधसाता सो अर्वता	6
वि नो वाजा ऋभुक्षणः पथश्चितन यष्टवे	
अस्मभ्यं सूरयः स्तुता विश्वा आशास्तरीषणि	7
तं नो वाजा ऋभुक्षण इन्द्र नासत्या रयिम्	
समश्वं चर्षणिभ्य आ पुरु शस्त मघत्तये	8

(10)

38

(म.4, अनु.4)

ऋषिः वामदेवः गौतमः	छन्दः त्रिष्टुप्	देवता द्यावापृथिवी 1, दधिक्राः 2-10
--------------------	------------------	-------------------------------------

उतो हि वां दात्रा सन्ति पूर्वा या पूरुभ्यस्त्रसदस्युर्नितोशे	
क्षेत्रासां ददथुरुर्वरासां घनं दस्युभ्यो अभिभूतिमुग्रम्	1
उत वाजिनं पुरुनिष्विध्वानं दधिक्रामु ददथुर्विश्वकृष्टिम्	
ऋजिप्यं श्येनं प्रुषितप्सुमाशुं चर्कृत्यमर्यो नृपतिं न शूरम्	2
यं सीमनु प्रवतैव द्रवन्तं विश्वः पूरुर्मदति हर्षमाणः	
पङ्क्तिर्गृध्र्यन्तं मेधयुं न शूरं रथतुरं वार्तामिव ध्रजन्तम्	3
यः स्मारुन्धानो गध्यां समत्सु सनुतरश्चरति गोषु गच्छन्	
आविर्ऋजीको विदथा निचिक्यत्तिरो अरतिं पर्याप आयोः	4
उत स्मैनं वस्त्रमथिं न तायुमनु क्रोशन्ति क्षितयो भरेषु	
नीचार्यमानं जसुरिं न श्येनं श्रवश्चाच्छा पशुमञ्च यूथम्	5
उत स्मासु प्रथमः सरिष्यन्नि वेवेति श्रेणिभी रथानाम्	
स्रजं कृण्वानो जन्यो न शुभ्वा रेणुं रेरिहत्किरणं ददुश्वान्	6
उत स्य वाजी सहुरिर्ऋतावा शुश्रूषमाणस्तन्वा समर्ये	
तुरं यतीषु तुरयन्नृजिप्योऽधि भ्रुवोः किरते रेणुमृञ्जन्	7
उत स्मास्य तन्यतोरिव द्योर्ऋघायतो अभियुजो भयन्ते	
यदा सहस्रमभि षीमयोधीहुर्वर्तुः स्मा भवति भीम ऋञ्जन्	8
उत स्मास्य पनयन्ति जना जूतिं कृष्टिप्रो अभिभूतिमाशोः	
उतैनमाहुः समिथे वियन्तः परा दधिक्रा असरत्सहस्रैः	9

आ दधिक्राः शवसा पञ्च कृष्टीः सूर्यइव ज्योतिषापस्तान |
सहस्रसाः शतसा वाज्यर्वा पृणक्तु मध्वा समिमा वचांसि || 10 ||

(6)

39

(म.4, अनु.4)

ऋषिः वामदेवः गौतमः

छन्दः त्रिष्टुप् 1-5, अनुष्टुप् 6

देवता दधिक्राः

आशुं दधिक्रां तमु नु ष्टवाम दिवस्पृथिव्या उत चर्किराम |
उच्छन्तीर्माषसः सूदयन्त्वति विश्वानि दुरितानि पर्षन् || 1 ||
महश्चर्कर्म्यर्वतः क्रतुप्रा दधिक्राव्णाः पुरुवारस्य वृष्णाः |
यं पूरुभ्यो दीद्विवांसं नाग्रिं ददथुर्मित्रावरुणा ततुरिम् || 2 ||
यो अश्वस्य दधिक्राव्णो अकारित्समिद्धे अग्रा उषसो व्युष्टौ |
अनागसं तमदितिः कृणोतु स मित्रेण वरुणेना सजोषाः || 3 ||
दधिक्राव्णा इष ऊर्जो महो यदमन्महि मरुतां नाम भद्रम् |
स्वस्तये वरुणं मित्रमग्निं हवामह इन्द्रं वज्रबाहुम् || 4 ||
इन्द्रमिवेदुभये वि ह्वयन्त उदीराणा यज्ञमुपप्रयन्तः |
दधिक्रामु सूदनं मर्त्याय ददथुर्मित्रावरुणा नो अश्वम् || 5 ||
दधिक्राव्णो अकारिषं जिष्णोरश्वस्य वाजिनः |
सुरभि नो मुखां कर्त्त्र ण आयूषि तारिषत् || 6 ||

(5)

40

(म.4, अनु.4)

ऋषिः वामदेवः गौतमः

छन्दः त्रिष्टुप् 1, जगती 2-5

देवता दधिक्राः 1-4, सूर्यः 5

दधिक्राव्ण इदु नु चर्किराम विश्वा इन्मामुषसः सूदयन्तु |
अपामग्रेरुषसः सूर्यस्य बृहस्पतैराङ्गिरसस्य जिष्णोः || 1 ||
सत्वा भरिषो गविषो दुवन्यसच्छ्रवस्यादिष उषसस्तुरण्यसत् |
सत्यो द्रवो द्रवरः पतङ्गरो दधिक्रावेषमूर्जं स्वर्जनत् || 2 ||
उत स्मास्य द्रवतस्तुरण्यतः पूर्णं न वेरनु वाति प्रगर्धिनः |
श्येनस्यैव ध्रजतो अङ्कसं परि दधिक्राव्णाः सहोर्जा तरित्रतः || 3 ||
उत स्य वाजी क्षिपुणिं तुरण्यति ग्रीवायां बद्धो अपिकक्ष आसनि |
क्रतुं दधिक्रा अनु संतवीत्वत्पथामङ्कांस्यन्वापनीफणत् || 4 ||
हंसः शुचिषद्वसुरन्तरिक्षसद्भोता वेदिषदतिथिदुरोणसत् |
नृषद्वरसदृतसद्योमसदुब्जा गोजा ऋतजा अद्रिजा ऋतम् || 5 ||

(11)

41

(म.4, अनु.4)

ऋषिः वामदेवः गौतमः

छन्दः त्रिष्टुप्

देवता इन्द्रावरुणौ

इन्द्रा को वां वरुणा सुम्रमाप स्तोमो हविष्मां अमृतो न होता |
यो वां हृदि क्रतुमां अस्मदुक्तः पस्पर्शादिन्द्रावरुणा नमस्वान् || 1 ||

इन्द्रा ह यो वरुणा चक्र आपी देवौ मर्तैः सुख्याय प्रयस्वान्	
स हन्ति वृत्रा समिथेषु शत्रूनवोभिर्वा महद्भिः स प्र शृण्वे	॥ 2 ॥
इन्द्रा ह रत्नं वरुणा धेष्टेत्या नृभ्यः शशमानेभ्यस्ता	
यदी सखाया सुख्याय सोमैः सुतेभिः सुप्रयसा मादयैते	॥ 3 ॥
इन्द्रा युवं वरुणा दिद्युर्मस्मिन्नोजिष्ठमुग्रा नि वधिष्टं वज्रम्	
यो नो दुरेवो वृकतिर्दभीतिस्तस्मिन्मिमाथामभिभूत्योजः	॥ 4 ॥
इन्द्रा युवं वरुणा भूतमस्या धियः प्रेतारा वृषभेवं धेनोः	
सा नो दुहीयद्यवसेव गृत्वी सहस्रधारा पयसा मही गौः	॥ 5 ॥
तोके हिते तनय उर्वरासु सूरौ दशीके वृषणश्च पौंस्ये	
इन्द्रा नो अत्र वरुणा स्यातामवोभिर्दस्मा परितक्म्यायाम्	॥ 6 ॥
युवामिद्भ्यवसे पूर्व्याय परि प्रभूती गविषः स्वापी	
वृणीमहे सुख्याय प्रियाय शूरा मंहिष्ठा पितरेव शंभू	॥ 7 ॥
ता वां धियोऽवसे वाज्यन्तीराजि न जग्मुर्युव्यूः सुदानू	
श्रिये न गाव उप सोममस्थुरिन्द्रं गिरो वरुणं मे मनीषाः	॥ 8 ॥
इमा इन्द्रं वरुणं मे मनीषा अग्मन्नुप द्रविणमिच्छमानाः	
उपैमस्थुर्जोष्टारइव वस्वो रघ्वीरीव श्रवसो भिक्षमाणाः	॥ 9 ॥
अश्व्यस्य त्मना रथ्यस्य पुष्टेर्नित्यस्य रायः पतयः स्याम	
ता चक्राणा ऊतिभिर्नव्यसीभिरस्मत्रा रायो नियुतः सचन्ताम्	॥ 10 ॥
आ नो बृहन्ता बृहतीभिरूती इन्द्रं यातं वरुणं वाजसातौ	
यद्विद्यवः पृतनासु प्रक्रीळान्तस्य वां स्याम सनितारं आजैः	॥ 11 ॥

(10)

42

(म.4, अनु.4)

ऋषिः त्रसदस्युः पौरुकुत्स्यः

छन्दः त्रिष्टुप्

देवता आत्मा 1-6, इन्द्रावरुणौ 7-10

मम द्विता राष्ट्रं क्षत्रियस्य विश्वायोर्विश्वे अमृता यथा नः	
क्रतुं सचन्ते वरुणस्य देवा राजामि कृष्टेरुपमस्य वत्रेः	॥ 1 ॥
अहं राजा वरुणो मह्यं तान्यसुर्याणि प्रथमा धारयन्त	
क्रतुं सचन्ते वरुणस्य देवा राजामि कृष्टेरुपमस्य वत्रेः	॥ 2 ॥
अहमिन्द्रो वरुणस्ते महित्वोर्वी गभीरे रजसी सुमेके	
त्वष्टैव विश्वा भुवनानि विद्वान्त्समैरयं रोदसी धारयं च	॥ 3 ॥
अहमपो अपिन्वमुक्षमाणा धारयं दिवं सदन ऋतस्य	
ऋतेन पुत्रो अदितेऋतावोत त्रिधातुं प्रथयद्वि भूमं	॥ 4 ॥
मां नरः स्वश्वा वाजयन्तो मां वृताः समरणे हवन्ते	

कृणोम्याजिं मघवाहमिन्द्र इयमिं रेणुमभिभूत्योजाः	॥ 5 ॥
अहं ता विश्वा चकरं नकिर्मा दैव्यं सहो वरते अप्रतीतम्	
यन्मा सोमासो ममदन्यदुक्थोभे भयेते रजसी अपारे	॥ 6 ॥
विदुष्टे विश्वा भुवनानि तस्य ता प्र ब्रवीषि वरुणाय वेधः	
त्वं वृत्राणि शृण्विषे जघन्वान्त्वं वृताँ अरिणा इन्द्र सिन्धून्	॥ 7 ॥
अस्माकमत्र पितरस्त आसन्त्सप्त ऋषयो दौर्गहे बध्यमाने	
त आयजन्त त्रसदस्युमस्या इन्द्रं न वृत्रतुरमर्धदेवम्	॥ 8 ॥
पुरुकुत्सानी हि वामदाशद्भ्येभिरिन्द्रावरुणा नमोभिः	
अथा राजानं त्रसदस्युमस्या वृत्रहणं ददथुरर्धदेवम्	॥ 9 ॥
राया व्यं संस्र्वांसो मदेम हव्येन देवा यवसेन् गावः	
तां धेनुमिन्द्रावरुणा युवं नो विश्वाहा धत्तमनपस्फुरन्तीम्	॥ 10 ॥

(7)

43

(म.4, अनु.4)

ऋषिः पुरुमीळहाजमीळहौ सौहोत्रौ	छन्दः त्रिष्टुप्	देवता अश्विनौ
-------------------------------	------------------	---------------

क उं श्रवत्कतमो यज्ञियानां वन्दारु देवः कतमो जुषाते	
कस्येमां देवीममृतेषु प्रेष्ठां हृदि श्रेषाम सुष्टुतिं सुहव्याम्	॥ 1 ॥
को मृळाति कतम आगमिष्ठो देवानामु कतमः शंभविष्ठः	
रथं कर्माहुर्द्रवदश्वमाशुं यं सूर्यस्य दुहितावृणीत	॥ 2 ॥
मक्षू हि ष्मा गच्छथ ईवतो द्यूनिन्द्रो न शक्तिं परितक्म्यायाम्	
दिव आजाता दिव्या सुपर्णा कया शचीनां भवथुः शचिष्ठा	॥ 3 ॥
का वां भूदुपमातिः कया न आश्विना गमथो हूयमाना	
को वां महश्चित्यजसो अभीक उरुष्यतं माध्वी दस्रा न ऊती	॥ 4 ॥
उरु वां रथुः परि नक्षति द्यामा यत्समुद्रादुभि वर्तते वाम्	
मध्वा माध्वी मधु वां प्रुषायन्यत्सीं वां पृक्षो भुरजन्त पृक्काः	॥ 5 ॥
सिन्धुर्ह वां रसया सिञ्चदश्वान्वृणा वयोऽरुषासुः परि ग्मन्	
तदू षु वामजिरं चेति यानं येन पती भवथुः सूर्यायाः	॥ 6 ॥
इहेह यद्वां समना पपृक्षे सेयमस्मे सुमतिर्वाजरत्वा	
उरुष्यतं जरितारं युवं ह श्रितः कामो नासत्या युवद्रिक्	॥ 7 ॥

(7)

44

(म.4, अनु.4)

ऋषिः पुरुमीळहाजमीळहौ सौहोत्रौ	छन्दः त्रिष्टुप्	देवता अश्विनौ
-------------------------------	------------------	---------------

तं वां रथं व्यमद्या हुवेम पृथुज्रयमश्विना संगतिं गोः	
यः सूर्या वहति वन्धुरायुर्गिर्वाहसं पुरुतमं वसूयुम्	॥ 1 ॥

युवं श्रियमश्विना देवता तां दिवो नपाता वनथः शचीभिः	
युवोर्वपुरभि पृक्षः सचन्ते वहन्ति यत्ककुहासो रथे वाम्	॥ 2 ॥
को वाम्द्या करते रातहव्य ऊतये वा सुतपेयाय वार्कैः	
ऋतस्य वा वनुषे पूर्व्याय नमो येमानो अश्विना ववर्तत्	॥ 3 ॥
हिरण्ययेन पुरुभू रथेनेमं यज्ञं नासत्योप यातम्	
पिबाथ इन्मधुनः सोम्यस्य दधथो रत्नं विधते जनाय	॥ 4 ॥
आ नो यातं दिवो अच्छा पृथिव्या हिरण्ययेन सुवृता रथेन	
मा वामन्ये नि यमन्देवयन्तः सं यद्वदे नाभिः पूर्व्या वाम्	॥ 5 ॥
नू नो रयिं पुरुवीरं बृहन्तं दस्रा मिमाथामुभयेष्वस्मे	
नरो यद्वामश्विना स्तोममार्वन्तस्सुधस्तुतिमाजमीळहासो अगमन्	॥ 6 ॥
इहेह यद्वामं समना पंपृक्षे सेयमस्मे सुमतिर्वाजरत्ना	
उरुष्यतं जरितारं युवं ह श्रितः कामो नासत्या युवद्रिक्	॥ 7 ॥

(7)

45

(म.4, अनु.4)

ऋषिः वामदेवः गौतमः

छन्दः जगती 1-6, त्रिष्टुप् 7

देवता अश्विनौ

एष स्य भानुरुदियति युज्यते रथः परिज्मा दिवो अस्य सानवि	
पृक्षासो अस्मिन्मिथुना अधि त्रयो दृतिस्तुरीयो मधुनो वि रंषाते	॥ 1 ॥
उद्वामं पृक्षासो मधुमन्त ईरते रथा अश्वास उषसो व्युष्टिषु	
अपोर्णुवन्तस्तम् आ परीवृतं स्वर्णं शुक्रं तन्वन्त आ रजः	॥ 2 ॥
मध्वः पिबतं मधुपेभिरासभिरुत प्रियं मधुने युञ्जाथां रथम्	
आ वर्तनिं मधुना जिन्वथस्पथो दृतिं वहेथे मधुमन्तमश्विना	॥ 3 ॥
हंसासो ये वां मधुमन्तो अस्त्रिधो हिरण्यपर्णा उहुव उषर्बुधः	
उदुप्रुतो मन्दिनो मन्दिनिस्पृशो मध्वो न मक्षः सर्वनानि गच्छथः	॥ 4 ॥
स्वध्वरासो मधुमन्तो अग्रयं उस्त्रा जरन्ते प्रति वस्तोरश्विना	
यन्त्रिक्तहस्तस्तरणिर्विचक्षणः सोमं सुषाव मधुमन्तमद्रिभिः	॥ 5 ॥
आक्रेनिपासो अर्हभिर्दविध्वतः स्वर्णं शुक्रं तन्वन्त आ रजः	
सूरश्चिदश्वान्युयुजान ईयते विश्वां अनु स्वधया चेतथस्पथः	॥ 6 ॥
प्र वामवोचमश्विना धियंधा रथः स्वश्वो अजरो यो अस्ति	
येन सद्यः परि रजांसि याथो हविष्मन्तं तरणिं भोजमच्छ	॥ 7 ॥

(7)

46

(म.4, अनु.5)

ऋषिः वामदेवः गौतमः	छन्दः गायत्री	देवता वायुः 1, इन्द्रवायू 2-7
--------------------	---------------	-------------------------------

अग्रं पिबन् मधूनां सुतं वायो दिविष्टिषु	। त्वं हि पूर्वपा असि	॥ 1 ॥
शतेना नो अभिष्टिभिर्नियुत्वाँ इन्द्रसारथिः	। वायो सुतस्य तृम्पतम्	॥ 2 ॥
आ वां सहस्रं हरय इन्द्रवायू अभि प्रयः	। वहन्तु सोमपीतये	॥ 3 ॥
रथं हिरण्यवन्धुरमिन्द्रवायू स्वध्वरम्	। आ हि स्थाथो दिविस्पृशम्	॥ 4 ॥
रथेन पृथुपार्जसा दाश्वान्समुप गच्छतम्	। इन्द्रवायू इहा गतम्	॥ 5 ॥
इन्द्रवायू अयं सुतस्तं देवेभिः सजोषसा	। पिबतं दाशुषो गृहे	॥ 6 ॥
इह प्रयाणमस्तु वामिन्द्रवायू विमोचनम्	। इह वां सोमपीतये	॥ 7 ॥

(4)

47

(म.4, अनु.5)

ऋषिः वामदेवः गौतमः	छन्दः अनुष्टुप्	देवता वायुः 1, इन्द्रवायू 2-4
--------------------	-----------------	-------------------------------

वायो शुक्रो अयामि ते मध्वो अग्रं दिविष्टिषु	।	
आ याहि सोमपीतये स्पार्हो देव नियुत्वता		॥ 1 ॥
इन्द्रश्च वायवेषां सोमानां पीतिर्महथः		।
युवां हि यन्तीन्द्रवो निम्नमापो न सध्वक्		॥ 2 ॥
वायुविन्द्रश्च शुष्मिणां सरथं शवसस्पती		।
नियुत्वन्ता न ऊतय आ यातं सोमपीतये		॥ 3 ॥
या वां सन्ति पुरुस्पृहो नियुतो दाशुषे नरा		।
अस्मे ता यज्ञवाहसेन्द्रवायू नि यच्छतम्		॥ 4 ॥

(5)

48

(म.4, अनु.5)

ऋषिः वामदेवः गौतमः	छन्दः अनुष्टुप्	देवता वायुः
--------------------	-----------------	-------------

विहि होत्रा अवीता विपो न रायो अयः । वायुवा चन्द्रेण रथेन याहि सुतस्य पीतये	।	॥ 1 ॥
निर्युवाणो अशस्तीनियुत्वाँ इन्द्रसारथिः । वायुवा चन्द्रेण रथेन याहि सुतस्य पीतये		॥ 2 ॥
अनु कृष्णे वसुधिते येमाते विश्वपेशसा । वायुवा चन्द्रेण रथेन याहि सुतस्य पीतये		॥ 3 ॥
वहन्तु त्वा मनोयुजो युक्तासो नवतिर्नव । वायुवा चन्द्रेण रथेन याहि सुतस्य पीतये		॥ 4 ॥
वायो शतं हरीणां युवस्व पोष्याणाम् । उत वां ते सहस्रिणो रथ आ यातु पार्जसा		॥ 5 ॥

(6)

49

(म.4, अनु.5)

ऋषिः वामदेवः गौतमः	छन्दः गायत्री	देवता इन्द्राबृहस्पती
--------------------	---------------	-----------------------

इदं वामास्ये हविः प्रियमिन्द्राबृहस्पती	। उक्थं मदश्च शस्यते	॥ 1 ॥
अयं वां परि षिच्यते सोम इन्द्राबृहस्पती	। चारुर्मदाय पीतये	॥ 2 ॥
आ न इन्द्राबृहस्पती गृहमिन्द्रश्च गच्छतम्	। सोमपा सोमपीतये	॥ 3 ॥

अस्मे इन्द्राबृहस्पती रयिं धत्तं शतृग्विनम्	अश्वान्तं सहस्रिणाम्	॥ 4 ॥
इन्द्राबृहस्पती वयं सुते गीर्भिर्हवामहे	अस्य सोमस्य पीतये	॥ 5 ॥
सोममिन्द्राबृहस्पती पिबतं दाशुषो गृहे	मादयेथां तदौकसा	॥ 6 ॥

(11)

50

(म.4, अनु.5)

ऋषिः वामदेवः गौतमः

छन्दः त्रिष्टुप् 1-9,11, जगती 10

देवता बृहस्पतिः 1-9,

इन्द्राबृहस्पती 10-11

यस्तस्तम्भ सहसा वि ज्मो अन्तान्बृहस्पतिस्त्रिषधस्थो रवेण	
तं प्रत्नासु ऋषयो दीर्घानाः पुरो विप्रा दधिरे मन्द्रजिह्वम्	॥ 1 ॥
धुनेतयः सुप्रकेतं मदन्तो बृहस्पते अभि ये नस्ततस्त्रे	
पृषन्तं सुप्रमदब्धमूर्वं बृहस्पते रक्षतादस्य योनिम्	॥ 2 ॥
बृहस्पते या परमा परावदत् आ तं ऋतस्पृशो नि षेदुः	
तुभ्यं खाता अवता अद्रिदुग्धा मध्वः श्रोतन्त्यभितो विरुषाम्	॥ 3 ॥
बृहस्पतिः प्रथमं जायमानो महो ज्योतिषः परमे व्योमन्	
सप्तास्यस्तुविजातो रवेण वि सप्तरश्मिरधमत्तमांसि	॥ 4 ॥
स स्रुष्टुभा स ऋक्ता गणेन वलं रुरोज फलिगं रवेण	
बृहस्पतिरुस्रिया हव्यसूदः कनिक्रदुद्वावशतीरुदाजत्	॥ 5 ॥
एवा पित्रे विश्वदेवाय वृष्णे यज्ञैर्विधेम नमसा हविर्भिः	
बृहस्पते सुप्रजा वीरवन्तो वयं स्याम् पतयो रयीणाम्	॥ 6 ॥
स इद्राजा प्रतिजन्यानि विश्वा शुष्मेण तस्थावभि वीर्येण	
बृहस्पतिं यः सुभृतं बिभर्ति वल्गुयति वन्दते पूर्वभाजम्	॥ 7 ॥
स इत्क्षेति सुधित् ओकसि स्वे तस्मा इळा पिन्वते विश्वदानीम्	
तस्मै विशाः स्वयमेवा नमन्ते यस्मिन्ब्रह्मा राजनि पूर्व एति	॥ 8 ॥
अप्रतीतो जयति सं धनानि प्रतिजन्यान्युत या सजन्या	
अवस्यवे यो वरिवः कृणोति ब्रह्मणे राजा तमवन्ति देवाः	॥ 9 ॥
इन्द्रश्च सोमं पिबतं बृहस्पतेऽस्मिन्यज्ञे मन्दसाना वृषण्वसू	
आ वां विशन्त्विन्दवः स्वाभुवोऽस्मे रयिं सर्ववीरं नि यच्छतम्	॥ 10 ॥
बृहस्पत इन्द्र वर्धतं नः सचा सा वां सुमतिभूत्वस्मे	
अविष्टं धियो जिगृतं पुरंधीर्जजस्तमर्यो वनुषामरातीः	॥ 11 ॥

| इति तृतीयाष्टके सप्तमोऽध्यायः समाप्तः |

ऋषिः वामदेवः गौतमः

छन्दः त्रिष्टुप्

देवता उषाः

इदमु त्यत्पुरुतमं पुरस्ताज्ज्योतिस्तमसो व्युनावदस्थात्		
नूनं दिवो दुहितरो विभातीर्गातुं कृणवन्नृषसो जनाय	॥ 1 ॥	
अस्थुरु चित्रा उषसः पुरस्तान्मिताइव स्वरवोऽध्वरेषु		
व्यू व्रजस्य तमसो द्वारोच्छन्तीरव्रञ्छुचयः पावकाः	॥ 2 ॥	
उच्छन्तीरुद्य चितयन्त भोजान्नाधोदेयायोषसो मघोनीः		
अचित्रे अन्तः पणयः ससन्त्वबुध्यमानास्तमसो विमध्ये	॥ 3 ॥	
कुवित्स देवीः सनयो नवो वा यामो बभूयादुषसो वो अद्य		
येना नवग्वे अङ्गिरे दशग्वे सप्तस्ये रेवती रेवदूष	॥ 4 ॥	
यूयं हि देवीर्ऋतयुग्भिश्चैः परिप्रयाथ भुवनानि सद्यः		
प्रबोधयन्तीरुषसः ससन्तं द्विपाञ्चतुष्पाञ्चरथाय जीवम्	॥ 5 ॥	
क्व स्विदासां कत्मा पुराणी यया विधाना विदधुर्ऋभूणाम्		
शुभं यच्छुभ्रा उषसश्चरन्ति न वि ज्ञायन्ते सदृशीरजुर्याः	॥ 6 ॥	
ता घा ता भद्रा उषसः पुरासुरभिष्टिद्युम्ना ऋतजातसत्याः		
यास्वीजानः शशमान उक्थैः स्तुवञ्छंसन्द्रविणं सद्य आप	॥ 7 ॥	
ता आ चरन्ति समना पुरस्तात्समानतः समना पप्रथानाः		
ऋतस्य देवीः सदसो बुधाना गवां न सर्गा उषसो जरन्ते	॥ 8 ॥	
ता इन्वेऽव समना समानीरमीतवर्णा उषसश्चरन्ति		
गूहन्तीरभ्वमसितं रुशब्दिः शुक्रास्तनूभिः शुचयो रुचानाः	॥ 9 ॥	
र्यिं दिवो दुहितरो विभातीः प्रजावन्तं यच्छतास्मासु देवीः		
स्योनादा वः प्रतिबुध्यमानाः सुवीर्यस्य पतयः स्याम	॥ 10 ॥	
तद्वो दिवो दुहितरो विभातीरुप ब्रुव उषसो यज्ञकैतुः		
व्यं स्याम यशसो जनेषु तद्व्यौश्च धत्तां पृथिवी च देवी	॥ 11 ॥	

ऋषिः वामदेवः गौतमः

छन्दः गायत्री

देवता उषाः

प्रति ष्या सूनरी जनी व्युच्छन्ती परि स्वसुः		दिवो अदर्शि दुहिता	॥ 1 ॥
अश्वैव चित्रारुषी माता गवामृतावरी		सखाभूदश्विनोरुषाः	॥ 2 ॥
उत सखास्यश्विनोरुत माता गवामसि		उतोषो वस्व ईशिषे	॥ 3 ॥
यावयद्वेषसं त्वा चिकित्वित्सूनृतावरि		प्रति स्तोमैरभुत्स्महि	॥ 4 ॥

प्रति भद्रा अदक्षतु गवां सर्गा न रश्मयः । ओषा अप्रा उरु ज्रयः ॥ 5 ॥

आपप्रुषीं विभावरि व्यावृज्योतिषा तमः । उषो अनु स्वधामव ॥ 6 ॥

आ द्यां तनोषि रश्मिभिरान्तरिक्षमुरु प्रियम् । उषः शुक्रेण शोचिषा ॥ 7 ॥

(7)

53

(म.4, अनु.5)

ऋषिः वामदेवः गौतमः

छन्दः जगती

देवता सविता

तद्देवस्य सवितुर्वार्यं महद्वृणीमहे असुरस्य प्रचेतसः ।

छर्दिर्येन दाशुषे यच्छति त्मना तन्नो महौ उदयान्देवो अक्तुभिः ॥ 1 ॥

दिवो धर्ता भुवनस्य प्रजापतिः पिशङ्गं द्वापिं प्रति मुञ्चते कृविः ।

विचक्षणः प्रथयन्नापृणन्नुर्वजीजनत्सविता सुम्रमुक्थ्यम् ॥ 2 ॥

आप्रा रजांसि दिव्यानि पार्थिवा श्लोकं देवः कृणुते स्वाय धर्मणे ।

प्र बाहू अस्त्राकसविता सवीमनि निवेशयन्प्रसुवन्नक्तुभिर्जगत् ॥ 3 ॥

अदाभ्यो भुवनानि प्रचाकशद्व्रतानि देवः सविताभि रक्षते ।

प्रास्त्राग्बाहू भुवनस्य प्रजाभ्यो धृतव्रतो महो अज्मस्य राजति ॥ 4 ॥

त्रिरन्तरिक्षं सविता महित्वना त्री रजांसि परिभूस्त्रीणि रोचना ।

तिस्रो दिवः पृथिवीस्तिस्त्र इन्वति त्रिभिर्व्रतैरभि नो रक्षति त्मना ॥ 5 ॥

बृहत्सुम्रः प्रसवीता निवेशनो जगतः स्थातुरुभयस्य यो वशी ।

स नो देवः सविता शर्म यच्छत्वस्मे क्षयाय त्रिवरूथमंहसः ॥ 6 ॥

आगन्देव ऋतुभिर्वर्धतु क्षयं दधातु नः सविता सुप्रजामिषम् ।

स नः क्षपाभिरहभिश्च जिन्वतु प्रजावन्तं रयिमस्मे समिन्वतु ॥ 7 ॥

(6)

54

(म.4, अनु.5)

ऋषिः वामदेवः गौतमः

छन्दः जगती 1-5, त्रिष्टुप् 6

देवता सविता

अभूद्देवः सविता वन्द्यो नु न इदानीमहं उपवाच्यो नृभिः ।

वि यो रत्ना भजति मान्वेभ्यः श्रेष्ठं नो अत्र द्रविणं यथा दधत् ॥ 1 ॥

देवेभ्यो हि प्रथमं यज्ञियेभ्योऽमृतत्वं सुवसिं भागमुत्तमम् ।

आदिद्वामानं सवितर्व्यूर्णुषेऽनूचीना जीविता मानुषेभ्यः ॥ 2 ॥

अचिन्ती यच्चकृमा दैव्ये जने दीनैर्दक्षैः प्रभूती पूरुषत्वता ।

देवेषु च सवितुर्मानुषेषु च त्वं नो अत्र सुवतादनागसः ॥ 3 ॥

न प्रमिये सवितुर्दैव्यस्य तद्यथा विश्वं भुवनं धारयिष्यति ।

यत्पृथिव्या वरिमन्ना स्वङ्गुरिर्वर्ष्मन्दिवः सुवति सत्यमस्य तत् ॥ 4 ॥

इन्द्रज्येष्ठान्बृहद्भ्यः पर्वतेभ्यः क्षयाँ एभ्यः सुवसि पस्त्यावतः ।

यथायथा पतयन्तो वियेमिर एवैव तस्थुः सवितः सुवार्य ते ॥ 5 ॥

ये ते त्रिरहन्त्सवितः सुवासो दिवेदिवे सौभगमासुवन्ति ।

इन्द्रो द्यावापृथिवी सिन्धुरद्भिरादित्यैर्नो अदितिः शर्म यंसत्

॥ 6 ॥

(10)

55

(म.4, अनु.5)

ऋषिः वामदेवः गौतमः

छन्दः त्रिष्टुप् 1-7, गायत्री 8-10

देवता विश्वे देवाः

को वस्त्राता वसवः को वरुता द्यावाभूमी अदिते त्रासीथां नः |
सहीयसो वरुण मित्र मर्तात्को वोऽध्वरे वरिवो धाति देवाः || 1 ||
प्र ये धामानि पूर्व्याण्यर्चान्वि यदुच्छान्वियोतारो अमूराः |
विधातारो वि ते दधुरजस्रा ऋतधीतयो रुरुचन्त दुस्माः || 2 ||
प्र पुस्त्याऽमदितिं सिन्धुमर्कैः स्वस्तिमीळे सुख्याय देवीम् |
उभे यथा नो अहनी निपात उषासानक्ता करतामदब्धे || 3 ||
व्यर्यमा वरुणश्चेति पन्थामिषस्पतिः सुवितं गातुमग्निः |
इन्द्राविष्णु नृवदु षु स्तवाना शर्म नो यन्तममवद्वरूथम् || 4 ||
आ पर्वतस्य मरुतामवांसि देवस्य त्रातुरत्रि भगस्य |
पात्पतिर्जन्यादंहसो नो मित्रो मित्रियादुत न उरुष्येत् || 5 ||
नू रोदसी अहिना बुध्येन स्तुवीत देवी अप्येभिरिष्टैः |
समुद्रं न संचरणे सनिष्यवो घर्मस्वरसो नद्योऽप व्रन् || 6 ||
देवैर्नो देव्यदितिर्नि पातु देवस्त्राता त्रायतामप्रयुच्छन् |
नहि मित्रस्य वरुणस्य धासिमर्हामसि प्रमियं सान्वग्नेः || 7 ||
अग्निरीशे वसुव्यस्याग्निर्महः सौभगस्य | तान्यस्मभ्यं रासते || 8 ||
उषो मघोन्या वह सूनृते वार्या पुरु | अस्मभ्यं वाजिनीवति || 9 ||
तत्सु नः सविता भगो वरुणो मित्रो अर्यमा | इन्द्रो नो राधसा गमत् || 10 ||

(7)

56

(म.4, अनु.5)

ऋषिः वामदेवः गौतमः

छन्दः त्रिष्टुप् 1-4, गायत्री 5-7

देवता द्यावापृथिवी

मही द्यावापृथिवी इह ज्येष्ठे रुचा भवतां शुचयद्भिरर्कैः |
वत्सीं वरिष्ठे बृहती विमिन्वन्नुवद्धोक्षा पंप्रथानेभिरेवैः || 1 ||
देवी देवेभिर्यजते यजत्रैरमिनती तस्थतुरुक्षमाणे |
ऋतावरी अद्भुहा देवपुत्रे यज्ञस्य नेत्री शुचयद्भिरर्कैः || 2 ||
स इत्स्वपा भुवनेष्वासु य इमे द्यावापृथिवी जजान |
उर्वा गभीरे रजसी सुमेकै अवंशे धीरः शच्या समैरत् || 3 ||
नू रोदसी बृहद्भिर्नो वरूथैः पत्नीवद्भिरिषयन्ती सजोषाः |
उरुची विश्वे यजते नि पातं धिया स्याम रथ्यः सदासाः || 4 ||
प्र वां महि द्यवीं अभ्युपस्तुतिं भरामहे | शुची उप प्रशस्तये || 5 ||
पुनाने तन्वा मिथः स्वेन दक्षेण राजथः | ऊह्यथे सनादृतम् || 6 ||

मूही मित्रस्य साधयस्तरन्ती पिप्रती ऋतम् । परिं यज्ञं नि षेदथुः ॥ 7 ॥

(8)

57

(म.4, अनु.5)

ऋषिः वामदेवः गौतमः

छन्दः अनुष्टुप् 1,4,6-7, त्रिष्टुप् 2-3,8, पुरउष्णिक् 5

देवता क्षेत्रपतिः 1-3, शुनः 4, शुनासीरौ 5,8, सीता 6-7

क्षेत्रस्य पतिना वयं हितेनेव जयामसि । गामश्वं पोषयित्वा स नो मृळातीदृशे ॥ 1 ॥
क्षेत्रस्य पते मधूमन्तमूर्मि धेनुरिव पर्यो अस्मासु धुक्ष्व
मधुश्चुतं घृतमिव सुपूतमृतस्य नः पतयो मृळयन्तु ॥ 2 ॥
मधुमतीरोषधीर्द्याव आपो मधुमन्नो भवत्वन्तरिक्षम्
क्षेत्रस्य पतिर्मधुमात्रो अस्त्वरिष्यन्तो अन्वेनं चरेम ॥ 3 ॥
शुनं वाहाः शुनं नरः शुनं कृषतु लाङ्गलम् । शुनं वरत्रा बध्यन्तां शुनमष्टामुदिङ्गय ॥ 4 ॥
शुनासीराविमां वाचं जुषेथां यद्विवि चक्रथुः पर्यः । तेनेमामुप सिञ्चतम् ॥ 5 ॥
अर्वाची सुभगे भव सीते वन्दांमहे त्वा । यथा नः सुभगाससि यथा नः सुफलाससि ॥ 6 ॥
इन्द्रः सीतां नि गृह्णातु तां पूषानु यच्छतु । स नः पर्यस्वती दुहामुत्तरामुत्तरां समाम् ॥ 7 ॥
शुनं नः फाला वि कृषन्तु भूमिं शुनं कीनाशा अभि यन्तु वाहैः
शुनं पर्जन्यो मधुना पर्योभिः शुनासीरा शुनमस्मासु धत्तम् ॥ 8 ॥

(11)

58

(म.4, अनु.5)

ऋषिः वामदेवः गौतमः

छन्दः त्रिष्टुप् 1-10, जगती 11 देवता अग्निसूर्याबोधृतानामन्यतमः

समुद्रादूर्मिर्मधुमाँ उदारदुपांशुना सममृतत्वमानत्
घृतस्य नाम गुह्यं यदस्ति जिह्वा देवानाममृतस्य नाभिः ॥ 1 ॥
वयं नाम प्र ब्रवामा घृतस्यास्मिन्यज्ञे धारयामा नमोभिः
उप ब्रह्मा शृणवच्छस्यमानं चतुःशृङ्गोऽवमीद्वौर एतत् ॥ 2 ॥
चत्वारि शृङ्गा त्रयो अस्य पादा द्वे शीर्षे सप्त हस्तासो अस्य
त्रिधा बद्धो वृषभो रौरवीति महो देवो मर्त्या आ विवेश ॥ 3 ॥
त्रिधा हितं पुणिभिर्गुह्यमानं गवि देवासो घृतमन्वविन्दन्
इन्द्र एकं सूर्य एकं जजान वेनादेकं स्वधया निष्टतक्षुः ॥ 4 ॥
एता अर्षन्ति हृद्यात्समुद्राच्छतत्रजा रिपुणा नावचक्षे
घृतस्य धारा अभि चाकशीमि हिरण्ययो वेत्सो मध्य आसाम् ॥ 5 ॥
सम्यक्स्रवन्ति सरितो न धेना अन्तर्हृदा मनसा पूयमानाः
एते अर्षन्त्यूर्मयो घृतस्य मृगाइव क्षिपुणोरीषमाणाः ॥ 6 ॥
सिन्धोरिव प्राध्वने शूघनासो वातप्रमियः पतयन्ति यद्वाः
घृतस्य धारा अरुषो न वाजी काष्ठा भिन्दन्मूर्मिभिः पिन्वमानः ॥ 7 ॥
अभि प्रवन्तु समनेव योषाः कल्याण्यशः स्मर्यमानासो अग्रिम्
घृतस्य धाराः समिधो नसन्त ता जुषाणो हर्यति जातवेदाः ॥ 8 ॥
कन्याइव वहतुमेतवा उ अञ्ज्यञ्जाना अभि चाकशीमि
यत्र सोमः सूयते यत्र यज्ञो घृतस्य धारा अभि तर्पवन्ते ॥ 9 ॥

अभ्यर्षत सुष्टुतिं गव्यमाजिमस्मासु भद्रा द्रविणानि धत्त |
इमं यज्ञं नयत देवतां नो घृतस्य धारा मधुमत्पवन्ते || 10 ||
धामन्ते विश्वं भुवन्मधि श्रितमन्तः समुद्रे ह्यद्यन्तरायुषि |
अपामनीके समिथे य आभृतस्तमश्याम् मधुमन्तं त ऊर्मिम् || 11 ||
| इति चतुर्थं मण्डलं समाप्तम् ।